

NÜXĨRAŪXŪ GA POPERA GA CORÍTIUCŪĂX GA YAXŌGÜXŪTANÜWA NAMUXŪ GA PAURU

Pauru rü nüxũ narümoxẽ ga yema yaxŏgũxũ ga Corítuarũ ãnewa yexmagũxũ

¹⁻² Pa Chaueneëgũ i Corítuucũăxgũx, choma i Pauru nixĩ i Tupana yaxuxũ norũ ngúchaxũmaã na Ngechuchu ya Cristu norũ puracũwa choxũ namuxũcèx. Rü choma rü namaã i taeneë i Chótene nixĩ i pexũ tarũmŏxëgũxũ rü pexcèx tanaxũmatũxũ i ñaã popera. Pa Chaueneëgũ ya Tupanaãrũ Ixĩgũxex, pema rü marũ Tupanapéxewa pixũüne yerũ Ngechuchu ya Cristu marũ pexũ nixũünexëë. Rü Tupana rü marũ pexũ nade na norũ duũxũgũ pixĩgũxũcèx wũxigu namaã i guxũma i ngẽma duũxũgũ i guxũwama tŏrũ Cori ya Ngechuchu ya Cristuxũ icuèxũũgũxũ. Rü nüma ya Ngechuchu ya tŏrũ Cori ixĩcũ, rü ngẽma duũxũgũarũ Cori ta nixĩ. ³ Rü chanaxwèxe ya Tanatũ ya Tupana rü tŏrũ Cori ya Ngechuchu ya Cristu norũ ngechaxũgagu poraãcũ pexũ narũngũxëë rü pexũ nataãëxëë.

Tupana tũxũ narũngũxëë erũ Cristuarũ duũxũgũ tixĩgũ

⁴ Rü taguma nüxũ charũchau na Tupanana moxë pexcèx chaxãxũ. Rü moxë nüxna chaxã naxcèx i ngema ngũxëë i Ngechuchu ya Cristugagu Tupana pexna ãmarexũ. ⁵ Yerũ Cristugagu Tupana pexna nanamu ga Naãxë i Üünexũ na pemaxã inaxãũxũcèx. Rü pexna

nanaxã ga norü ore, rü naétü pexű nanatauxchaxêê na nüxű pecuáxűcèx na ñuxű ñaxűchiga yixixű. ⁶ Rü yemaäcü yexguma nüxű pexĩnüëgu ga yema ore ga Cristuchiga rü aixcüma peyaxögü. ⁷ Rü ngẽmacèx i ñuxma na ípenanguxêëxű na wena táxarü núma naxűxű ya tórü Cori ya Ngechuchu ya Cristu, rü Tupana pexna nanaxã i taxű i cuèx na taxuűma pexű taxuxűcèx na naxcèx pemaxêxű. ⁸ Rü ngẽmaäcü tá pexna nadau ya Tupana ñuxmatáta nagú i naãne, rü guxűgutáma pexű naporaexêê na aixcüma peyaxögüamaxűcèx rü naxcèx pemaxêxűcèx, na taxúema chixexűmaã pexű ixuguxűcèx i ngẽxguma wenaxãrü núma naxuxgu ya tórü Cori ya Ngechuchu ya Cristu. ⁹ Rü Tupana rü guxűguma nayanguxêê i norü uneta. Rü nüma nixĩ ga pexű nadexű na aixcüma Nane ya tórü Cori ya Ngechuchu ya Cristumücügü pixiguxűcèx.

Nügü nitoye ga yema yaxögüxű

¹⁰ Pa Chaueneëgüx, tórü Cori ya Ngechuchu ya Cristuégagu pexű chacèxű na wüxigu pegümaã perüxĩnüëxű rü tama pegü pitoyexűcèx. Rü name nixĩ i aixcüma pegü pengechaűgü rü aixcüma wüxigutama perüxĩnüë i peãëwa. ¹¹ Pa Chaueneëgüx, pemaã nüxű chixu i ngẽma ore, yerü Croétanüxütanüwa nüxű chacuáchiga ga pegümaã na penuëxű, rü tama aixcüma wüxigu na perüxĩnüëxű. ¹² Rü pemaã nüxű chixu i ngẽma erü ñuxre i pema rü ñaperügügü:

“Choma rü Pauruwe charüxű”, ñaperügügü. Rü togue rü:

“Choma rü Aporuwe charüxű”, ñaperügügü. Rü togue rü:

“Choma rü Pedruwe charüxű”, ñaperügügü. Rü togue rü:

“Choma rü Cristuwe charüxü”, ñaperügügi. ¹³ ¿Rü ñuxäcü nixĩ i ngëma? ¿Pexcèx rü Cristu rü marü niyauxye? ¿Éxna pema nüxü pecuèxgu rü choma i Pauru chiixü ga curuchawa pexcèx chipotaxü rü chayuxü? ¿Rü éxna pema nüxü pecuèxgu rü chauégagu yiixü ga ípebaiixü? ¹⁴ Rü Tupanana moxë chaxã, yerü taxúema pexü íchabaiixëë ga pemax. Rü Crispu rü Gayuxicatama nixĩ ga íchabaiixëëxü. ¹⁵ Rü ngëmacèx taxucürüwa texé tügü tixu na chauégagu ítabaixü. ¹⁶ Rü yemääcü aixcüma íchanabaiixëë ga Estéfanatanüxügü ta, natürü chauxcèx rü taxúema ga togue tüxü íchabaiixëë. ¹⁷ Yerü nüma ga Cristu rü tama choxü namu ga duixügüxü na íchabaiixëëxücèx, natürü choxü namu na duixügümaã nüxü chixuxücèx i norü ore i mexü i tüxü maxëxëëxü. Rü nanaxwëxe i tauxchaxü i oremaã nüxü chixu i ngëma ore. Erü ngëxguma chi ñoma nüxü cuèxüchixürüü nüxü chixuxgu i ngëma ore, rü ngürüächi i duixügü rü tá chauguama narüxĩnüë rü tá nüxü inayarüngümaë na Cristu yiixü ga tüxü maxëxëëcü ga yexguma curuchagu nayuxgux.

Cristuwa nixĩ ga Tupana inawéxü ga norü pora rü norü cuèx

¹⁸ Rü ngëma ore na ñuxäcü tórü pecaducèx curuchagu nayuxü ga Cristu, rü wüxi i natücèxmamare nixĩ naxcèx i ngëma duixügü i poxcuwa íxü. Natürü yixema na Tupana tüxü maxëxëëxü, rü nüxü tacuèx na ngëma ore rü Tupanaärü pora yiixü. ¹⁹ Erü norü ore i úmatüxüwa rü ñanagürü ga Tupana:

“Rü tá ichayanaxoxëë i guxüma i norü cuèx i ngëma duixügü i nüxü cuèxüchigüxü. Rü tá nüxü chaxo i ngëma duixügüarü cuèx”,

ñanagürü. ²⁰ Rũ ñuxmax, Pa Chaueneëgũx, ¿Tupanapéxewa rũ tacüwa namexũ i ngẽma duũxũgũ i poraãcũ nüxũ cuèxüchixũ? ¿Rũ tacüwa namexũ i ngẽma duũxũgũ i Moĩché ümatüxũ i mugüwa nguxëëtaegüxũ? ¿Rũ tacüwa namexũ i ngẽma duũxũgũ i meã nüxũ cuèxgüxũ i ñoma i naãneãrũ cuáchigagu na yadexagüxũ? Erũ guxũma i ngẽma cuèx i duũxũgũ nagu rüxĩnũxũ rũ Tupanacèx rũ taxuwama name. ²¹ Natürü nüma ya Tupana ya guxũxũma cuácü, rũ tama nanaxwèxe na ñoma i naãnecũãx i duũxũgüarũ cuágagu na yĩxũ i naxütawa nangugüxũ i nümagü. Natürü nanaxwèxe na ngẽma norü ore i mexũgagu na yĩxũ i namaxëxëãxũ i ngẽma duũxũgũ i yaxõgüxũ woo togücèx rũ natücèx-mamare yixĩgu i ngẽma ore. ²² Ngẽma Yudíugü rũ nüxũ nadaugüchaũ i cuèxruũgũ i Tupanaãrũ poramaã üxũ. Rũ ngẽma Griégugü rũ naxcèx nadaugü i ñoma i naãneãrũ cuèx. ²³ Natürü ngẽma ore i toma nüxũ tixuxũ, rũ Cristu ga curuchawa ipotacüchiga nixĩ. Rũ ngẽma ore rũ naãëwa nangux i ngema Yudíugü. Rũ ngẽma duũxũgũ i tama Yudíugü ixĩgüxũcèx rũ wüxi i natücèxmamare nixĩ. ²⁴ Natürü ngẽma duũxũgũ i Tupana dexũ i Yudíugü rũ éxna tama Yudíugü ixĩgüxũ rũ ngẽma duũxũgücèx Tupana inanawéx i norü pora rũ norü cuèx ga yexguma pecaducèx nayuxgu ga Cristu. ²⁵ Rũ yema Tupana üxũ ga yexguma nayuxgu ga Cristu rũ muxũma i duũxũgücèx rũ wüxi i ngẽãëmare nixĩ. Natürü ngẽma Tupana nagu rüxĩnüxũ rũ guxũma i ñoma i naãnecũãx i duũxũgüarũ cuèxarũ yexera nixĩ. Rũ yexguma curuchagu nayuxgu ga Cristu rũ muxũma ga duũxũgücèx rũ natura ga Tupana ga yexguma. Natürü yexguma nixĩ ga inawéãxũ ga ñuxãcü

guxĩ i duĩxũgũarũ yexera na naporaxũchixũ. ²⁶ Pa Chaueneẽgũx, name nixĩ i nagu perũxĩnũẽ na ñuxãcü Tupana pexũ dexũ na norũ duĩxũgũ pixĩgũxũcèx. Rũ noxretama pixĩgũ na nũxũ pecuèxũchixũ ega duĩxũgũ pexũ ngugũgu, rũ noxretama pixĩgũ na ãẽxgacũgũ pixĩgũxũ, rũ noxretama pixĩgũ i ngẽma itaarũ dĩeruáxũtanũxũ pixĩgũxũ. Natũrũ woo ngẽma na pixĩgũgu rũ Tupana rũ pexũ nade na norũ duĩxũgũ pixĩgũxũcèx. ²⁷ Rũ Tupana nanade ga yema duĩxũgũ ga togũ ga duĩxũgũ nũxũ ixuxgu rũ taxuũma icuáxũ. Rũ yemaãcü nanaxũ ga Tupana na naxãneẽxẽãxũcèx i ngẽma duĩxũgũ i nũxũ icuèxũchixũ. Rũ Tupana nanade ga yema duĩxũgũ ga togũ nũxũ ixuxgu rũ turaexũ. Rũ yemaãcü nanaxũ ga Tupana na naxãneẽxẽãxũcèx i ngẽma duĩxũgũ i poraexũ. ²⁸ Rũ Tupana nanade ga yema duĩxũgũ ga togũ nũxũ oexũ, rũ ñoma i naãnewa taxuũma ixĩgũxũ. Rũ yemaãcü Tupana nanaxãneexẽẽ i ngẽma duĩxũgũ i ñoma i naanewa norũ ngemaxũgũmaã nũgũ icuèxũũgũxũ. ²⁹ Rũ ngẽmacèx taxucũrũwama texé tũgũ ticuèxũũ i Tupanapéxewa. ³⁰ Rũ nũmatama ga Tupana nixĩ ga Ngechuchu ya Cristuarũ duĩxũgũxũ pexũ yaxĩgũxẽẽxũ. Rũ tatanũwa nanamu ga Cristu na nũma tũxna naxããxũcèx i cuèx i aixcũma ixĩxũ, rũ pecaduwa tũxũ íngangũxũxẽẽxũcèx. Rũ nũma ya Cristu nixĩ i tũxũ namaxẽxẽẽxũ rũ tũxũ yamexẽẽgũxũ na aixcũma ixũünexũcèx napéxewa ya Tupana. ³¹ Rũ ngẽmacèx i Tupanaãrũ ore i ìmatũxũwa rũ ñanagũrũ:

“Rũ ngẽxguma texé tũgũ icuèxũũchaũgu rũ name nixĩ i tórũ Corixũ ticuèxũũ”,
ñanagũrũ.

2

Cristu ga curuchawa ipotacüchiga

¹ Pa Chaueneëgüx, yexguma noxri petanüwa chaxüxgu na pemaã nüxü chixuxüçèx ga Tupanaärü ore i aixcüma ixixü i Cristuchiga, rü tama ñoma nüxü cuèxüchixürüüãcüma pemaã chidexa, rü tama ore ga guxchaxümaã nixĩ ga pemaã nüxü chixuxü. ² Yerü yexguma petanüwa chayexmagu, rü Cristuchigaxüxĩcatama nixĩ ga pemaã chixuxü. Rü taxuüma ga tacü ga togu charüxĩnü. Rü yemaãcü Ngechuchu ya Cristu ga curuchawa ipotacüguxicatama nixĩ ga charüxĩnüxü. ³ Rü yexguma petanüwa changuxgu rü nüxü chadau ga taxü ga guxchaxügü ga petanüwa, rü yemacèx poraãcü chaxoegaãë rü Tupanapewa chorü muümaã chidurux. ⁴ Rü yexguma pemaã chideaxgu rü pemaã nüxü chixuxgu ga Tupanaärü ore, rü tama ñoma nüxü cuèxüchixürüüãcüma pemaã nüxü chixu na yemaãcü pexü chanangúchaüxëëxü na peyaxögüxüçèx. Natürü Tupanaãë i Ünexüärü ngüxëëmaã rü Tupanaärü poramaã nixĩ ga pexü chanangúchaüxëëxü. ⁵ Rü yemaãcü Tupanaärü poramaã pemaã nüxü chixu ga yema ore na Tupanagagu yĩxü na nüxü peyaxögüxü, rü tama ñoma i naãnecüãx i duüxügüarü cuágagu na yĩxü.

Tupana rü Naãë i Ünexüwa nügü tuxü nacüxëë

⁶ Natürü pemaã nüxü chixu, rü ngëxguma natanüwa changëxmagu i ngëma duüxügü i marü meãma yaxögüxü, rü ngëxguma nixĩ i chanangüxëëxü i ngëma aixcüma Tupanaarü cuèx i ünexü. Natürü ngëma cuèx rü tama ñoma i naãnewa ne naxü, rü bai i ñoma i naãneärü aëxgacügü i paxa tá iyarüxoxüwa ne naxü. ⁷ Natürü

ngẽma cuèx rü Tupanawa nixĩ i ne naxũxũ. Rü ngẽma cuèx nixĩ ga noxri tauta naãne ùxgu Tupanaxĩcatama nüxũ cuáxũ ga na ñuxácü tá tuxna naxããxũ i maxũ i taguma gúxũ. ⁸ Natürü yema Tupana nagu rüxĩnũxũ, rü taxuũma ga ñoma ga naãnecũăx ga ãëxgacü nüxũ nacuèx. Yerü yexguma chi aixcũma nüxũ nacuèxgũgu ga yema Tupana nagu rüxĩnũxũ rü tãũ chima curuchawa nayapotagü ga guma mecü ya tórü Cori. ⁹ Rü ngemachiga nixĩ i Tupanaãrũ ore i ümatũxũwa i ñaxũ:

“Rü ngẽma duũxũgü i Tupanaxũ ngechaũgũxũcèx, rü nüma nanamexẽẽ i țacü i taxúema nüxũ dauxũ, rü taguma texé nüxũ ñnũxũ, rü bai i texé nagu rüxĩnũxũ”,

ñaxũ. ¹⁰ Rü ngẽma Tupana mexẽẽxũ naxcèx i ngẽma duũxũgü i nüxũ ngechaũgũxũ, rü ñuxma rü tuxũ nüxũ nacuèxẽẽ i ngẽma, yerü núma nanamu ga Naãẽ i Üünexũ na taxcèx nangoxẽẽãxũcèx. Rü ngẽma Naãẽ i Üünexũ rü guxũxũma nacuèx, rü èixrũxũ i ngẽma Tupanaxĩcatama nüxũ cuáxũ rü ta nüxũ nacuèx. ¹¹ Rü duũxũgütanuwa rü țtexé nüxũ tacuèx na țacügu naxĩnũxũ i wüxi ya yatü? Rü naãẽxĩcatama nixĩ i nüxũ cuáxũ i ngẽma nagu naxĩnũxũ i ngẽma yatü. Rü ngëxgumarũũ ta Tupanaãẽ i Üünexũxĩcatama nixĩ i nüxũ cuáxũ na țacügu naxĩnũxũ ya Tupana. ¹² Rü yixema rü tama ñoma i naãnecũăx i naãẽ nixĩ ga iyauxgũxũ. Natürü tanayauxgü i ngema Naãẽ i Üünexũ ga Tupana taxcèx núma muxũ na aixcũma nüxũ icuáxũcèx i guxũma i ngẽma mexũgü ga Tupana norü ngechaũmaã tuxna ãmarexũ. ¹³ Rü ñuxma na pemaã nüxũ tixuxũ i ngẽmachiga, rü Tupanaãẽ i Üünexũ toxna ãxũ i oremaã nixĩ i pemaã nüxũ tixuxũ. Rü tama ore i torü cuèxwa tayaxuxũmaã nixĩ i pemaã nüxũ tixuxũ. Rü

ngẽmaãcü nüxũ tixu i Tupanaãe i Üünexũãrũ ore namaã i ngẽma duũxũgũ i aixcũma Tupanaãe nawa ngẽxmagũxũ. ¹⁴ Rü texé ya tama Tupanaãe i Üünexũ tümawa ngẽxmaxẽ, rü taxucürüwa tanayaxu i ngẽma Tupanaãe i Üünexũ tüxũ nguxẽẽxũ, erü tümacèx ya yíxema duũxẽ rü natúcèx-mamare nixĩ. Rü tama nüxũ tacuèxéga erü yíxema Tupanaãe i Üünexũ tümawa ngẽxmaxẽxícatama tixĩ ya nüxũ cuáxe na tanangugũxũ na ñuxũ ñaxũchiga yíxũ i ngẽma Tupanaãe i Üünexũ tüxũ nguxẽẽxũ. ¹⁵ Rü yíxema duũxẽ ya Tupanaãe i Üünexũ tümawa ngẽxmaxẽ, rü meã tanangugũ i guxũma. Natürü ngẽma togũ i duũxũgũ i tama Tupanaxũ cuèxgũxũ, rü taxucürüwama tümããrũ maxũxũ nangugũ ya yíxema duũxẽ ya aixcũma Tupanaãe tümawa ngẽxmaxẽ. ¹⁶ Erü Tupanaãrũ ore i ümatũxũwa rü ñanagürü:

“¿Texé nüxũ tacuèx na țacũgu naxĩnüxũ ya tórũ Cori? ¿Rü texé nüxũ tacuèx na Tupanaxũ taxucuxẽxũ?”

ñanagürü. Natürü yixema nixĩ i aixcũma nüxũ icuáxũ i ngẽma Cristu nagu rüxĩnüxũ.

3

Pauru rü Aporu rü wüxigu Tupanaãxũ napuracüe

¹ Pa Chaueneëgũx, yexguma noxri petanüwa changuxgu, rü taxucürüwa ngẽma duũxũgũ i Tupanaãe nawa ngẽxmaxũmaã chidexaxũrũũãcü pemaã chidexa. Natürü ñoma i naãnecũãx i tama Tupanaxũ cuèxgũxũmaã chideaxgurũ nixĩ ga pemaã chidexaxũ. Yerü pema rü yexwacèx, peyaxõgũ ga yexguma, rü yemacèx yexwacèx yaxõgũxũmaã chideaxũrũũãcü pemaã nüxũ chixu ga Cristuchiga. ²⁻³ Rü tauxchaxũ ga oremaã pexũ changúexẽ, ngẽxgumarũ i wüxi i õxchana ega noxri

nabuxgu rü naëgüenixũ ya tauxchaãcü yaxaxüne nüxna taxã. Rü yemaãcü tauxchaxũ ga oremaã pemaã nüxũ chixu ga Tupanaãrü ore ga noxrix, yerü taxucürüwa nüxũ pecuèéga ga Tupanaãrü ore ga guxchaxũ. Rü ñuxma rü ta tama nüxũ pecuèéga i Tupanaãrü ore i guxchaxũ, erü ñoma tama yaxögüxũ i duïxũgürüütama pemaxë. Rü dücax, ngëxguma ñuxma rü ta pixãũxãchiwèxegu rü pegümaã penuëgu, rü ngëmawa nangox na ngëma tama yaxögüxũrüüacütama nagu perüxĩnũëxũ rü ñoma i nañecũãxrüüacütama na pemaxëxũ. ⁴ Rü ngëxguma petanüwa wüxie ñágügu rü:

“Choma rü Pauruwe charüxũ”, ñágügu, rü togue rü:

“Choma rü Aporuwe charüxũ”, ñágügu, rü ngëmawa nüxũ tacuèx na ngëma duïxũgü i tama yaxögüxũrüüacüma na pemaxëxũ. ⁵ Rü ngëxguma meã nagu rüxĩnũëgu, ¿rü tacü chixĩ i choma i Paurux? rü ¿tacü nixĩ i nüma i Aporux? Toma rü Tupanaãrü duïxũgümare tixĩgü, rü togagu nixĩ ga nüxũ peyaxögüxũ ga tórü Cori ya Ngechuchu. Rü wüxichigü ga toma rü tanaxü ga yema puracü ga tórü Cori toxna axũ. ⁶ Rü chauxütawa nixĩ ga nüxũ pexĩnũëxũ rü peyaxögüxũ ga Tupanaãrü ore ga noxrix. Rü Aporu nixĩ ga pexũ rüngüxëëcü na yexeraãcü meã peyaxögüxũ ga yema ore. Natürü Tupana nixĩ ga pexũ maxëxëëcü. ⁷ Rü ngëmacèx woo yíxema tüxira duïxũgümaã nüxũ ixuxe i Tupanaãrü ore rü woo yíxema wixwena yexeraãcü duïxũgüxũ ngúexëxë, rü taxuüma tixĩgü. Natürü Tupana nixĩ ya guxüma ücü, erü nüma nixĩ i duïxũgüxũ namaxëxëxũ. ⁸ Rü ngëmaãcü ya yíxema tüxira duïxũgümaã nüxũ ixuxe i Tupanaãrü ore, rü yíxema wixwena yexeraãcü duïxũgüxũ ngúexëxë rü tawüxigumare i ngëma puracüwa. Natürü Tupana

rü tá tüxú nanaxütanü i tümaärü puracü ya wüxichigü ngëxgumarüü na ñuxácü tanaxüxü i ngema puracü. ⁹ Rü ngëmaäcü i toma rü wüxigu Tupanaäxü tapuracüe. Rü ngëmaäcü nixi i perü maxüwa napuracüxü ya Tupana na nüma nanaxwëxexüäcüma pixigüxüçèx. ¹⁰ Rü choma nixi ga Tupana choxü muxü na chaxira pemaã nüxü chixuxüçèx ga Cristuchiga. Rü togü nixi ga chowena yexeraäcü pexü ngüexëxü. Natürü guxäma ya texé ya naxúxe i ñaã puracü rü name nixi i taxuãë na meã tanaxüxüçèx. ¹¹ Rü ñaã puracü rü Ngechuchu ya Cristuwa nixi ga inaxügüxü, rü ngëmacèx taxucürüwama texé tayangucuchixëë i to i tüxü maxëxëxü. ¹² Rü ñuxma na norü puracü ixüxü i wüxichigü i yixema, rü tanaxwëxe i taxuãë na aixcüma meã naxüxü i ngëma. Erü yíxema aixcüma meã naxúxe i norü puracü, rü ñoma wüxi i ipataarü üruü i uirumü rü diërumü rü nuta i mexëchixümaã üpataxürüü tixi. Natürü yíxema tama aixcüma meã naxúxe i ngëma Cristuarü puracü rü ñoma ipataarü üruü i chixexü i naï rü naixátü rü dëxnemenëxãmaremaã üpataxürüü tixi. ¹³ Natürü ngëxguma naguxgu i naãne, rü tá nangox na ñuxácü naxüäxü i Tupanaärü puracü i wüxichigü i duüxü. Erü ngëma ngunexügu rü tá nangëxma ya üxü ya taxüchine. Rü ñoma tacü üxüwa iguxürüü tá nixi i Tupana nüxü na üxü i wüxichigü i duüxüärü puracü na nüxü nacuáxüçèx ngoxi aixcüma name rü éxna tama. ¹⁴ Rü yíxema aixcüma meã naxúxe i Cristuarü puracü, rü yima ipata ya taixüne ya tama üxümaã ixaxünerüü tá nixi i ngëma tümaärü puracü. Rü tá Tupanaxütawa tanayaxu i tümaärü natanü naxçèx i ngëma taxüxü. ¹⁵ Natürü yíxema

tama aixcūma meã naxúxe i ngēma puracū, rü yima ĩpata ya tama taixūne ya üxūmaã ixaxūnerūũ tá nixĩ i ngēma tūmaārū puracū. Rū tá ngēxma inayarūxomare i guxūma i ngēma taxūxū. Rū tūxicatama tāūtáma tixa ñoma wūxi i duūxū i üxüemawa iyagoxūrūũ. ¹⁶ ;Tama éxna nüxū pecuèx i pema rü Tupanapata na pixĩgūxū, rü ngema Naãe ya Tupana rü pewa na namaxūxū? ¹⁷ Rū ngēxguma texé pexū chixetanūxēēgu, rü Tupana tá tūxū napoxcu, erü Tupanapata ya nawa namaxūne rü naxūüne. Rū pematama nixĩ ya yima Tupanapata na pixĩgūxū. ¹⁸ Tama name i texé tūgūtama tawomūxēē. Rū ngēxguma petanūwa texé tūgūgu rüxĩnūgu na wūxi i duūxū i nüxū cuáxe na tiixū i ñoma i nañewa, rü name nixĩ i ñoma taxuūma tacuáxūrūũ tūgū tixĩxēē. Rū ngēxguma tá nixĩ i wūxi i duūxū i aixcūma nüxū cuáxe tá tiixū. ¹⁹ Erü ñoma i nañeārū cuèx rü wūxi i ngēãemare nixĩ i Tupanacèx. Erü Tupanaārū ore i ümatūxūwa rü ñanagürü:

“Rü ngēma duūxūgū i nūgūgu rüxĩnūèxū na nüxū cuèxūchigūxū yĩxū, rü norü cuèxgutama ĩnanatūexēē ya Tupana”,

ñanagürü. ²⁰ Rū toxnamana i Tupanaarü orewa rü ñanagürü ta:

“Tórü Cori ya Tupana rü nüxū nacuèx na taxuwama namexū i ngēma norü ĩnū i ngēma duūxūgū i ñoma i naanewa cuèxwa ngugūxū”,

ñanagürü. ²¹ Rū ngēmacèx tama name i texé tūgū ticuèxūxū ega duūxūgüarü cuèxwamare tarūxūxgu.. Erü Tupana rü marū pexna nanaxã i guxūma na pexrū yĩxūcèx. ²² Rū ngēmacèx i choma i Pauru, rü taeneē ya Aporu, rü taeneē ya Pedru, rü ñoma i nañe, rü torü maxū,

rü torü yu, rü ñomatama i ngunexũ, rü moxũãrũ ngunexũ, rü guxũma i ngẽma rü pexrũ nixĩ. ²³ Rü pematama rü Cristuarũ pixĩgũ. Rü Cristu rü Tupanaãrũ nixĩ.

4

Yema ngúexũgũ ga Ngechuchu imugũxũãrũ puracũchiga

¹ Rü ngẽmacèx tanaxwèxe i tomaã nagu perũxĩnũe na Cristuarũ puracũtanũxũmare na tixĩgũxũ. Rü nüma nixĩ i toxũ namuxũ na pexũ tangúexẽxũcèx ga yema ore ga noxri Tupanaxĩcatama nüxũ cuáxũ. ² Rü ngẽxguma texé ãacũ rü puracũ tüxna ãxgu, rü name nixĩ i aixcũma tayanguxẽẽ i ngẽma puracũ i tüxna taxãxũ na ngẽmaãcũ itanawéxũcèx na aixcũma wüxi i duũxũ i mexũ tixĩxũ. ³ Rü ngẽmacèx i ñuxma na meã chayanguxẽẽchaũxũ i ngẽma puracũ i Tupana choxna ãxũ, rü taxucèxma chaugücèx chaxoegaã ega woo choxna pecagu rü éxna ãacũ rü ãẽxgacũgũ choxna caxgu naxcèx i ngẽma puracũ i chaxũxũ. Rü woo i chomatama rü taxuxũcèxma íchicuèx na ngextá chixri chanaxũxũ i ngẽma puracũ. ⁴ Natürũ ñuxma na chomatama nagu charũxĩnũxũ na nataxuũma i chorũ chixexũ i Tupanapéxewa, rü tama ngẽmacèx Tupana choxũ nadau na changearũ pecaduáxũ. Erũ nümatama ya tórũ Cori ya Tupana nixĩ i aixcũma choxũ nacuáarũ maxũáxũ. ⁵ Rü ngẽmacèx tama name na toxũ pengugũarũ maxũáxũ naxũpa na núma naxũxũ ya tórũ Cori. Natürũ name nixĩ i nüxũ ípenanguxẽẽ, erũ nüma tá nixĩ i nangoxẽẽãxũ i guxũma i ngẽma ñuxma icũxũ rü guxũma i ngẽma duũxũgũ naãewa nagu rüxĩnũèxũ. Rü ngẽxguma tá nixĩ ya Tupana i tümamaã nataãèxũ ya wüxichigũ ya yíxema aixcũma mexũ ügũxe. ⁶ Pa Chaueneẽgũx, perũ mexũcèx nixĩ i pemaã nüxũ

tixuxũ i ngẽma ore na ngema Tupana naxwèxexũãcũma pemaxẽxũ. Rũ choma rũ Aporu nixĩ i perũ cuèxruũgũ tixĩgũxũ na towa pengúexũ na Tupanaãrũ ore pemaã nũxũ ixuxũrũũãcũ penaxũxũ. Rũ ngẽmacèx tama name na wũxi i perũ nguxẽtaexũmaã petaãègũxũ rũ to rũ nũxũ pexoexũ. ⁷ Rũ ñuxma rũ pexna chaca, ¿rũ texé tixĩ ya yíxema pemaã nũxũ ixuxe na togüarũ yexera pexũ ixĩxẽexẽ? ¿Erũ guxũma i ngema cuèx i pexũ ngẽxmaxũ rũ Tupana pexna nanaxã? Rũ ñuxma na nũma pexna naxããxũ i ngẽma cuèx ¿rũ tũxcũũ pegũ picuèxũũgũ ñoma pematama perũ poramaã penayaxuxũrũũ? ⁸ Rũ pegũgu perũxĩnũègu rũ aixcũma marũ meãma Tupanaxũ picuèxũchi rũ marũ pexũ nangẽxma i guxũma i tacũ i penaxwèxexũ na naxũtawa pengugũxũcèx. Rũ pegũgu perũxĩnũègu rũ ñoma ãèxgacũgũ i taxũrũũ pixĩgũ rũ taxuũma toxũtawa penaxwèxe i ñuxmax. ¡Chierũ aixcũma Tupanapèxewa ãèxgacũgũ pixĩgũgu na toma rũ ta wũxigu pemaã ãèxgacũgũ na tixĩgũxũcèx! ⁹ Rũ toma na Ngechuchu toxũ imugũxũ, rũ chauxcèx rũ wixwe toxũ nawogũ ya Tupana. Rũ ñoma poxcuexũ i yuewa ixũrũũ tixĩgũ. Rũ ñoma wũxi i tacũ i nũxũ nacugũexũrũũ tixĩgũ i napèxewa i Tupanaãrũ orearũ ngeruũgũ i daxũcũãx, rũ napèxewa i ñoma i naãnecũãx i duũxũgũ, rũ napèxewa i guxũma i tacũ i Tupana üxũ. ¹⁰ Rũ ñuxma na Cristuwe tarũxĩxũ, rũ ngẽmacèx taxuũma icuáxũ toxũ nawogũ i duũxũgũ, natürũ i pema rũ pegũgu perũxĩnũègu rũ guxũxũma pecuèx i Cristuchiga. Toma nũxũ tacuèx na duũxũgũpèxewa taturaexũ, natürũ i pema rũ pegũgu perũxĩnũè na aixcũma peporaexũ. Rũ duũxũgũ toxũ naxo, natürũ pexũ nangechaũgũ. ¹¹ Rũ ñuxma rũ ta

tama inayacuèx na ngúxũ tingegüxũ, erü ñuxma rü ta taiya toxũ nangux, rü tiṭawae, rü tangexchiru. Rü duïxũgü rü chixri tomaã nachopetü, rü tangepata. ¹² Rü tipae na yeücürü toxméxmaã tapuracüeechaxũ. Rü duïxũgü rü ṭacü tomaã nixugüe, natürü i toma rü mexũ i oremaã tanangãxũgü. Rü towe ningëxũtanü, natürü yaxna namaã taxĩnüë. ¹³ Rü chixri tochiga nidexagü, natürü i toma rü meã nachiga tidexagü. Rü ñoma guxchirexũ nadaugüxürüũ tomaã nixĩgü, rü ñoma duïxũgü i taxuwama mexũäcü toxũ nixĩxëë. Rü ñuxma rü ta ngemagutama tomaã naarüxinüë. ¹⁴ Tama pexcèx chanaxümatü i ñaã popera na pexũ chaxãneëxëxücèx. Natürü pexcèx chanaxümatü na pexũ chixucuxëgüxücèx chauxacügüxüchirüũ, erü pexũ changechaũ. ¹⁵ Erü woo nangëxmagu i muxüma i perü nguxëëruũgü i Cristuchiga pexũ ngüxëëxũ, natürü chaxicatama nixĩ i penatü chiixũ ga Cristuxũ na peyaxuxüwa. Yerü chauxütawa nixĩ ga noxri ga penayaxuxũ ga Ngechuchu ya Cristuarü ore i tüxũ maxëëxëxũ. Rü ngëmacèx chaxicatama nixĩ i penatü chiixũ i perü õwa. ¹⁶ Rü ngëmacèx pexũ chacèèxũ na chauxrüxũ meã pemaxëxũ. ¹⁷ Rü ngëmacèx pexütawa chanamu ya Timutéu ya poraãcü nüxũ changechaücü ya chaune ixĩcü i tórü Coriarü orewa. Rü nüma rü aixcüma meã nayanguxëë i guxüma i ngëma nagu chana-muxũ. Rü nüma tá pexna nüxũ nacuèxãchixëë na ñuxãcü Ngechuchu ya Cristu naxwèxexũäcüma meã chamaxũxũ rü chanangüxëëxũ ga yema yaxögüxũ ga natanügu chixügüxũ. ¹⁸ Rü ñuxre i pemagü rü pegü picuèxüügü, erü nagu perüxinüë na tagutáma pexütawa íchayadauxũ. ¹⁹ Natürü ngëxguma nanaxwèxegu ya tórü Cori, rü paxa tá ngema chaxũ na pexũ íchayadauxücèx. Rü ngëxguma rü

tá chomaxũchi nũxũ chadau ngoxi ngẽma duũxũgũ i nũgũ icuèxũũgũxũ nũxũ nangẽxma i Tupanaãrũ pora rũ éxna yadoragũmare. ²⁰ Erũ Tupanaãrũ pora rũ tama nũxũ tixumare, natũrũ nagu ítamaxẽ i ngema pora. ²¹ ¿Rũ ñuxma rũ țacũ éxna nixĩ i penaxwèxexũ i pema? ¿Penaxwèxe na pexũ chingagũxũ i ngẽxguma ngema changuxgu, rũ éxna penaxwèxe na pexũ changechaũãcũma rũ pemaã chamecũmaãcũma pexũ na íchayadauxũ?

5

Duũxũgũ i chixri maxẽxũchiga

¹ Rũ duũxũgũ nũxũ nixugũgũ rũ wũxi i yatũ i petanũwa rũ naèrũcũmaãtama naxãmèx. Rũ ngẽma nixĩ i pecadu i poraãcũ chixexũchixũ, erũ woo ngẽma duũxũgũ i tama yaxõgũxũtanũwa rũ tama ngẽmaãcũ naxũpetũ. ² ¿Rũ ñuxãcũ i pema i ngẽxguma i pegũ picuèxũũgũamaxũ? Rũ narũmemaẽ chi nixĩ na poraãcũ pengechaũgũxũ. Rũ ngẽma yatũ i ngẽma chixexũ ùxũ rũ name nixĩ na ípenamuxũchixũ i petanũwa. ³ Rũ woo tama petanũwa changẽxmagu i chomax, natũrũ guxũguma pegu charũxĩnũ. Rũ ñoma pexũtawa changẽxmaxũrũũ rũ tórũ Cori ya Ngechuchu ya Cristuégagu pemaã nũxũ chixu na țacũ tá namaã pexũxũ i ngẽma duũxũ. ⁴ Rũ name nixĩ i tórũ Cori ya Ngechuchu ya Cristuégagu pengutaquéxegũ. Rũ nũma ya tórũ Cori ya Ngechuchu rũ tá napetanũgu na pexũ naporaexẽxũcèx. Rũ choma rũ tá pexna chacuèxãchi i chorũ yumũxẽwa. ⁵ Rũ ngẽma norũ poxcu i tá nũxna pexãxũ i ngẽma yatũ, rũ ngẽma tá nixĩ na ípenamuxũchixũ i petanũwa na Chataná ngũxũ nũxũ ingexẽxũcèx. Rũ ngẽmaãcũ tá inayarũxo i naxũneãrũ

ngúchaũ i chixexũ, natürü naãẽ rü tá namaxũ i ngëxguma wena núma naxũxgu ya tórü Cori ya Ngechuchu. ⁶ ;Rü tama name i pema rü pegü picuèxũũ naxcèx i ngëma pexũxũ! ;Tama éxna nüxũ pecuèx i ngëma ore i ñaxũ:

“Wüxi i íraxũ i pãũãrü puxëëruũ rü taxũma i pãũchara nipuxëë”, ñaxũ? ⁷ Rü ngëmacèx name nixĩ i nüxũ perüxoe i guxũma i nuxcümaũxũ i pecüma i pexũ chixexëëxũ. Rü ngëxguma ngëmaãcü penaxũxgu, rü ñoma ngexwacaxũxũ i pãũ i ngearü puxëëruũáxũ i Üpetüchigaarü petawa ingóxürüũ tá pime. Rü ñuxma i pema rü aixcüma ngexwacaxũxũ i duũxũgü pixĩgü, yerü Cristu rü ñoma wüxi i carnerurüũ marü tachicüü tórü pecaducèx nayu. ⁸ Rü ngëmacèx name nixĩ i nüxũ tarüxoe i nuxcümaũxũ i tacüma i chixexũgü rü aixcüma Tupanagu tarüxĩnũẽ rü meã naxcèx tamaxê, erü ngexwacaxũxũ i norü duũxũgü tixĩgü. ⁹ Nüxĩraũxũ ga chorü poperawa rü pemaã nüxũ chixu na tama natanügu pexãgũxũ i ngëma duũxũgü i naĩ i ngemaã naxũneãrü ngúchaũ ügũxũ. ¹⁰ Natürü yexguma yema ñachagu pexũ, rü tama pemaã nüxũ chixu na nüxna pixĩgachitanüxũchixũ i ngëma duũxũgü i tama yaxögũxũ i naĩ i ngemaã maxëmarexũ, rü éxna ngëma duũxũgü i guxũma i ñacü nügüna nugüchaũgũxũ, rü éxna ngítèèxgũxũ, rü éxna ngëma duũxũgü i tupanane-tachicünèxãxũ icuèxüũgũxũ. Erü ngëxguma chi naxchaxwa ípechoũxgu i ngëma duũxũgü, rü chi taxucürüwa i ñoma i naãnewa pengëxmagü. ¹¹ Natürü yexguma pemaã nüxũ chixuxgu na tama natanügu pexãgũxũ i ngëma duũxũgü i chixri maxëxũ, rü nachiga chidexa i ngëma duũxũgü i nügü ixugũxũ na peeneëgü i yaxögũxũ na yixĩgũxũ natürü naĩ i ngemaã maxëxũ, rü éxna

aiëxũ, rü éxna tupanetachicünèxãxũ icuèxũũgũxũ, rü éxna oregütèèxgũxũ, rü éxna ngãxewèxegũxũ, rü éxna ngítèèxgũxũ. Rü ngẽma duũxũgũ nixĩ i pemaã nüxũ chixuxũ na tama namexũ na natanügu pexãgũxũ rü bai i namaã na pechibüexũ. ¹²⁻¹³ Erü tama choxméxwa nangëxma na nüxna chaçaxũ i ngẽma duũxũgũ i tama Tupanaãxũ yaxõgũxũ. Rü Tupana tá nixĩ ya nüxna çacü i ngẽma duũxũgũ. Natürü i pema rü peméxwa nangëxma na nüxna pecaxũ i ngẽma peeneëgũ i yaxõgũxũ i tama meã maxëxũ. Rü name nixĩ i petanüwa ípenamuxũchi i ngẽma duũxũ i chixri maxũxũ.

6

Ngëxguma ÷acü rü guxchaxũ tüxũ ngëxmagu taeneëmaã, rü tama name i ãëxgacügü i tama yaxõgũxũpëxewa tayamexëë i ngẽma

¹ Rü ngëxguma wüxie i pema pexũ nangëxmagu i ÷acü rü guxchaxũ i wüxi i peeneë i yaxõxũmaã, ¿rü tüxcüũ wüxi i ãëxgacü i tama yaxõxũãrũ ngũxëëcèx ípeyaca na nüma pexũ namexëëãxũcèx i ngẽma perü guxchaxũgü? ¿Rü tama éxna inamexũ i ngẽma peeneëgü i yaxõgũxũ na namexëëgũxũ i ngẽma perü guxchaxũgü? ² ¿Tama éxna nüxũ pecuèx na yixema na yaxõgũxũ tá yĩixũ i naãneãrũ guxgu nüxna icagũxũ i guxũma i ñoma i naãnecũãx i duũxũgü? Rü ñuxma na pema tá yĩixũ i ñoma i naãnecũãx i duũxũgũxũ picagũxũ, ¿rü tüxcüũ taxucürüwa i pematama penamexëë i ngẽma perü guxchaxũgü i írachiréxũ? ³ ¿Tama éxna nüxũ pecuèx rü woo ngẽma daxũcũãx i Tupanaãrũ orearü ngeruũgü,

rü yixema tá yïxũ i nüxũ icagüxũ? Rü ngẽmacèx nixĩ i yexeraãcü peméxwa nangẽxmaxũ na ñuxãcü penamexẽẽxũ i ngẽma guxchaxũgü i ñoma i naãnewa pexũ ngẽxmagüxũ. ⁴ Rü ngẽmacèx, ngẽxguma tacü rü guxchaxũ pexũ ngẽxmagu i ñoma i naãnewa, ¿rü tüxcüũ i ngẽma ãẽxgacügü i tama yaxõgüxũxũtawa pegü ípeyaxuaxũgüxũ na pexũ namexẽẽgüãxũcèx i ngẽma? ⁵ Rü pemaã nüxũ chixu i ngẽma ore na pexãneẽxũcèx. ¿Éxna tataxuma i petanüwa ya wüxie ya nüxũ cuãxe na tanamexẽẽxũ i ngẽma guxchaxũgü i petanüwa ngẽxmaxũ? ⁶ Rü tama pegümaã penuẽxĩcatama, natürü naetü rü ãẽxgacügü i tama yaxõgüxũxũtawa pexĩ na penamexẽẽxũcèx i ngẽma perü guxchaxũgü. ⁷ Rü ngẽma na pegümaã penuẽxũ, rü ngẽma rü poraacü chixexũ nixĩ. ¿Rü tüxcüũ tama yaxna namaã pexĩnüë i ngẽma guxchaxũgü i peeneẽ pemaã üxũ? ¿Rü tüxcüũ tama namaã peporae ega texé perü tacücèx ngĩxgux? ⁸ Natürü i pema rü poraacü chixexũ pexüe, erü woo peeneẽgü i yaxõgüxũãxũ rü ta pengix.. ⁹⁻¹⁰ ¿Tama éxna nüxũ pecuèx na ngẽma duũxũgü i chixexũ ügüxũ rü nataxuxũtãma i nachica i ngextã Tupana ãẽxgacü íyïxũwa? ¿Rü tama name i pegütama pewomüxẽẽgü! Erü ngextã Tupana ãẽxgacü íyïxũwa rü nataxũtãma i nachica i ngẽma duũxũgü i naĩ i ngemaã ipexũ, rü ngẽma duũxũgü i tupananetachicünèxãxũ icuèxüügüxũ, rü ngẽma duũxũgü i naxmèxèchita rü éxna nateechita ngẽãẽxũ, rü ngẽma yatügü i naxrüũ yatüxũmaã ngẽãẽxũ, rü ngẽma ngítèèxgüxũ, rü ngẽma duũxũgü i nügünaxica nanuxũchixũ i norü ngẽmaxũgü, rü ngẽma duũxũgü i ngãxewèxegüxũ, rü ngẽma duũxũgü i oregütèèxgüxũ,

rü ngẽma duũxũgũ i womũxẽẽwèxegũxũ. Rü guxũma i ngẽmagũ rü nataxũtama i nachica i ngextá Tupana ãẽx-gacũ íyĩxũwa. ¹¹ Rü yexgumarũõtama pixĩgũ ga ñuxre ga pema ga ũpax. Natürũ i ñuxma ya Tupana rü marũ pexũ Ínanapi i perũ chixexũ na noxrũxicatama pixĩgũxũcèx. Rü ñuxma rü aixcũma napéxewa pime yerũ Naãe i Üünexũ rü tórũ Cori ya Ngechuchu ya Cristuégagu marũ perũ pecaduna pexũ Ínangũxũẽẽ.

Ñuxãcü naxũüne i taxũne

¹² Rü ñuxre i pema rü ñaperũgũgũ:

“Rü marũ name na chanaxũxũ i ngẽma chanaxwèx-exũ”, ñaperũgũgũ. Rü aixcũma nixĩ i ngẽma, natürũ tama guxũ i ngẽma ixũgũxũ rü tũxũ name. Rü aixcũma nixĩ i Tupana choxũ Ínguxuchixẽẽxũ na chanaxũxũcèx i ngẽma chanaxwèxexũ, natürũ tama name na tacũ rü chixexũgu chaugũ changũxẽẽxũ na chomaã inacuáxũcèx.

¹³ Rü ngẽxgumarũũ ta rü ñuxre i duũxũgũ rü ñanagürũgũ:

“Rü õna rü taxũnecèx nixĩ, rü taxũne rü õnacèx nixĩ”, ñanagürũgũ. Rü aixcũma ngẽmaãcü nixĩ, natürũ ya Tupana rü tá inayanaxoxẽẽ i guxũma i ngẽma. Rü taxũne rü tama naĩ i ngemaã namaã na ingẽãẽmarexũcèx nixĩ. Erũ taxũnemaã nixĩ i naxũxũ i tórũ Coriarũ ngúchaũ. Rü tórũ Cori nixĩ ya taxũnexũ maxẽẽcü. ¹⁴ Rü yema Tupana wena namaxẽẽxũrũũ ga tórũ Cori ya Ngechuchu, rü ngẽxgumarũũ tá ta norũ poramaã wena tũxũ namaxẽẽẽ.

¹⁵ ¿Rü tama éxna nüxũ pecuèx na ngẽma pexene rü Cristuarũ na yĩxũ? ¿Rü ñuxãcü i ngẽma chaxune i Cristuarũ ixĩxũ rü ngexũ i ngẽãẽxũmaã inapexũ? Taxucürũwama ngẽmaãcü nixĩ. ¹⁶ ¿Rü éxna tama nüxũ pecuèx ega wũxi i ngexũ i ngẽãẽxũmaã inapexgu ya wũxi ya yatũ rü

ngẽma taxre i naxũne rü wüxitama i naxũne yĩxũ? Erü Tupanaãrü ore i ümatüxũwa rü ñanagürü:

“Ngẽma taxre i naxũne rü wüxitama i naxũne tá nixĩ”, ñanagürü. ¹⁷ Natürü ngẽxguma wüxi i duũxũ rü tórü Cori ya Cristuaxũ yaxõõxgu, rü ngẽma naãẽ i ngẽma duũxũ rü Cristuãẽmaã wüxigutama narüxĩnũẽ. ¹⁸ Rü ngẽmacèx name nixĩ na nüxũ perüxoexũ i pexeneãrü ngúchaũ na pexüxũ. Rü guxũma i togü i pecadu i wüxi i duũxũ üxũ rü tama naxũnexũ nachixexẽ. Natürü ngẽma na naĩ i ngemaã nangẽãexũ rü ngẽma waxi nixĩ i naxũnexũ chixexẽexũ. ¹⁹ ¿Tama éxna nüxũ pecuèx i pexene rü Tupanaãẽ i Üünexũpata na yĩxũ? Rü pegu nixĩ i naxãchiüxũ i ngẽma Naãẽ i Üünexũ i Tupana pexna muxũ. Rü ngẽmacèx i pema rü tama pegüarü yoratama pixĩgü. ²⁰ Erü Tupana rü marü pexcèx nataxe rü po-raãcü nüxũ petatanü. Rü ngẽmacèx penaxwèxe i ngẽma pexenemaã meã Tupanacèx pemaxẽ na ngẽmaãcü namaã penataxẽexũ ya Tupana.

7

Ucuxëgü i ãmèxchiga

¹ Rü ñuxma rü tá pexũ changãxũ ga yema ãmèxchiga ga choxna naxcèx pecaxũ ga perü poperawa. Rü narümemãẽ chi nixĩ i noxtacüma tama naxãmax ya yatü. ² Natürü ngẽma na naxũneãrü ngúchaũ na naxügümarexũ i duũxügü, rü narümemãẽ nixĩ i wüxichigü ya yatü rü na naxãmaxũ, rü wüxichigü i nge rü na naxãtexũ. ³ Rü yima yatü ya ãmacü rü taxucürüwama naxmèxna nügü ninuxũ. Rü ngẽma nge i ãtecü rü taxucürüwama ngĩtena ngĩgü iyanuxũ. ⁴ Erü ngẽma nge i ãtecü rü tama ngĩgüxũneãrü yoratama iyixĩ, erü ngĩte nixĩ ya ngĩxĩneãrü yora ixĩcü.

Rü ngëxgumarüü ya ngïte rü tama nügüxüñeärü yora nixĩ, erü naxmèx iyixĩ i naxüñeärü yora ixĩcü. ⁵ Rü tama name i wüxi ya yatü rü namèxna nügü ninuxü, rü éxna wüxi i ngecü rü ngïtena ngïgü iyanuxü, ega tama nügümaã namexëëãgu na ñuxre i ngunexü tama nügümaã namaxëxü naxcèx na nayumüxëgüxü. Rü ngëmawena rü name nixĩ na wenaxärü noxrirüü nügümaã namaxëxü na tama Chataná nüxna ñnuxücèx na chixexügu nayixëëãxücèx. ⁶ Rü guxüma i ñaã ore i pemaã nüxü chixuxü i ãmèxchiga rü ätechiga rü tama wüxi i mu nixĩ i ngëma. Natürü pemaã nüxü chixumare na nüxü pecuáxücèx na namexü i ngëmaäcü na penaxüxü. ⁷ Rü chomatama nagu charüxĩnü rü chierü name nixĩ ega choma chamaxüürüü namaxëgu i guxüma i duüxügü. Natürü Tupana rü wüxichigü i duüxüna nanaxã i nacüma na ñuxäcü namaxëxücèx rü ñuxäcü nagu naxĩnuxücèx. Rü ngëmácèx tama guxãma tawüxigu. ⁸ Rü ngëma ngemèxgüxü rü ngetegüxü rü yutegüxü rü namaã nüxü chixu rü narümemaë nixĩ i chauxrüü tama naxãmèx rü tama naxãte. ⁹ Natürü ngëxguma wüxi i duüxü taxucürüwa naxüñeärü ngúchaümaã naporagu, rü name nixĩ na naxãmaxü rü éxna naxãtexü. Erü narümemaë nixĩ i noxtacüma naxãmèx rü éxna naxãte na tama ngema norü ngúchaügagu düxwa chixexügu nanguxücèx. ¹⁰ Natürü yíxema marü ãmaxë rü ätexe, rü tümamaã nüxü chixu na tama namexü na tümatexü na ítátaxü. Rü ngëma mu rü tórü Coriarü mu nixĩ, rü tama choxrü nixĩ. ¹¹ Natürü ngëxguma chi ngürüächi wüxi i ngexü natexü ítèxgu, rü name nixĩ i noxtacüma nangete rü éxna wena natecèx nataegu. Rü ngëxgumarüü ta ya yatü rü tama name i namèxü ñnatèx. ¹² Rü ñuxma rü

choxũ nangẽxma i wũxi i ore i tũmacèx ya yĩxema ãmaxẽ ngĩmaã i wũxi i nge i tama yaxõxcũ. Rũ ngẽma ore rũ choxrũtama nixĩ rũ tama tórũ Coriarũ nixĩ. Rũ ngẽxguma wũxi ya yatũ ya õcũ ngĩmaã ãmaxgu i wũxi i nge i tama yaxõxcũ, rũ tama name i ngĩxũ ínatèx, ega ngĩma rũ aixcũma namaã naxãtechaũgu. ¹³ Rũ ngẽxguma wũxi i nge i yaxõxcũ ãtegu namaã ya wũxi ya yatũ ya tama yaxõcũ, rũ tama name i ínatèx ya yima ngĩte ega nũma ya yima yatũ rũ aixcũma ngĩmaã naxãmèxchaũgu. ¹⁴ Rũ yima yatũ ya tama yaxõcũ, rũ namèx i yaxõxcũgagu Tupana nũxũ nacuèx. Rũ ngẽma ngecũ i tama yaxõxcũ, rũ ngĩte ya yaxõcũgagu Tupana ngĩxũ nacuèx. Erũ ngẽxguma chi tama ngẽmaãcũ yixĩgu, rũ chi ngẽma naxãcũgũ rũ duũxũgũ i tama yaxõgũxũãcũgũrũũ tá nixĩgũ. Natũrũ i ñuxma ya naxãcũgũ rũ marũ Tupana tũxũ nacuèx. ¹⁵ Natũrũ ngẽxguma yima yatũ ya tama yaxõcũ rũ namèxũ ínatáxchaũgu rũ ñnoxtacũma ngĩxũ ínatá! Rũ ngẽxgumarũũ ega ngẽma ngecũ i tama yaxõcũ rũ ngĩtexũ ínatáxchaũgu, rũ ñnoxtacũma ngĩtexũ ínatá! Rũ ngẽxguma ya yima yatũ ya yaxõcũ rũ marũ name ega wena naxãmèxgu. Rũ ngẽma ngecũ i yaxõcũ rũ marũ name ega wena naxãtegu. Erũ Tupana pexũ nade na pegũ pengechaũgũxũcèx. ¹⁶ Rũ ngẽmacèx, Pa Ngecũ i Tupanaãxũ Yaxõxcũx, rũ ngẽxguma cute i tama yaxõxũ cuxũ ítáxchaũgu, namẽ nixĩ i tama cunachũxu, erũ tama nũxũ cucuèx ngoxi tá nũxũ cuyaxõxẽẽ i ngẽma cute rũ éxna tama. Rũ cumax, Pa Yatũ ya Yaxõxcũx, rũ ngẽxguma cuxmèx i tama yaxõxũ cuxũ ítáxchaũgu, rũ name nixĩ i tama cunachũxu, erũ tama nũxũ cucuèx ngoxi tá ngĩxũ cuyaxõxẽẽ i ngẽma cuxmèx rũ éxna tama. ¹⁷ Rũ ñuxma rũ pemaã nũxũ chixu rũ nũma ga Tupana

rü wüxichigü ga duïxëna nanaxã ga tûmaãrû cuèx na tûmaãrû maxûmaã itacuáxüçèx rû meã tanaxüxüçèx i ngëma puracü ga noxri tüxü yexmaxü ga tauta Tupana tûmacèx caxgu. Rû ngëma nguxëëtae nixĩ i namaã chanangüexëëxü i guxüma i yaxögüxü i wüxichigü ya tupaucawa ngëxmagüxü. ¹⁸ Rû ngëxguma Tupana naxcèx caxgu i wüxi i duïxü i marü Yudfugürüü íwiechëxmüpéxechiraüxü, rû nüetama nixĩ ega ngëmaãcütama yixïgu. Rû ngëxguma Tupana nayauxgu i wüxi i duïxü i tama íwiechëxmüpéxechiraüxü, rû nüetama nixĩ ega ngëmaãcütama yixïgu. ¹⁹ Erü Tupanapéxewa rû nüetama nixĩ ega wüxi i duïxü rû ínawiechëxmüpéxechiraügu rû éxna tama. Erü ngëma Tupana aixcûma naxwëxexü nixĩ na naga naxïnúxü i wüxichigü i duïxü. ²⁰ Rû wüxichigü i duïxü rû name nixĩ i nawatama napuracü ga yema puracü ga nüxü yexmaxü ga yexguma Tupana noxri naxcèx caxgu. ²¹ Rû yexguma wüxi ga coriarü duïxü quixïyane Tupana cuxcèx caxgu, rû tama name i ngëmacèx cuxoegaãë. Natürü ngëxguma cuxü natauxchagu na nüxna ícunguxuchixü i ngëma cori, rû marü name na ícunguxuchixü. ²² Rû cuma ga na cucoriãxyane cuxcèx naçaxü ga Tupana, rû name nixĩ i nüxna cucuèxãchi na Cori ya Cristu pecaduwa cuxü ínguxuchixëëxü. Rû cuma ga na cungearü coriãxyane cuxcèx naçaxü ga Tupana, rû name nixĩ i nüxna cucuèxãchi na tórü Cori ya Cristuarü duïxü quiixü i ñuxma na nüxü cupuracüxüçèx. ²³ Tupana rû marü pexcèx nataxe rû poraãcü nüxü petatanü. ;Rû ngëmacèx i ñuxma rû tãütama naga pexïnüë i ngëma duïxügü i wenaxãrü ñoma i naãneãrü chixexüwa

pexũ gagũchaũxũ! ²⁴ Rũ name nixĩ, Pa Chaueneẽgũx, i wũxichigũ i pema rũ meã Tupanapẽxewa penaxũama ga yema puracũ ga noxri pexũ yexmaxũ ga yexguma Tupana pexcẽx caxgu. ²⁵ Rũ ñuxma rũ tá pemaã nüxũ chixu i nachiga i ngẽma duũxũgũ i ngemẽxgũxũ rũ ngetegũxũ. Rũ tórũ Cori ya Ngechuchu rũ taxuũma i mu choxna naxã i ngẽmachiga. Natürũ tá pemaã nüxũ chixu i ñuxãcũ nagu charũxĩnũ i ngẽmachiga. Rũ ngẽma chorũ ore rũ aixcũma nixĩ erũ choma nixĩ i wũxi i duũxũ ga nüxũ changechaũtũmũãcũma choxũ nayaxuxũ ga tórũ Cori. ²⁶ Natürũ ngema ñuxma nüxũ idauxũ i guxchaxũgũgagu rũ chauxcẽx rũ chi name i tama nixãmẽx i ngẽma yatũgũ i ngemẽxgũxũ. ²⁷ Rũ ngẽxguma marũ cuxãmẽxgu rũ tama name i ngĩxũ ícutẽx. Natürũ ngẽxguma cungemẽxgu rũ name i tama cuxãmẽx. ²⁸ Natürũ ngẽxguma cuxãmẽxgu rũ tama pecadu nixĩ i ngẽma. Rũ ngẽxguma wũxi i paxũ ãtegu rũ tama pecadu nixĩ i ngẽma. Natürũ ngẽma ixãmẽxgũxũ rũ ixãtegũxũ rũ tá nayexera i norũ guxchaxũgũ i ñoma i naãnewa, rũ ngẽma nixĩ i tama chanaxwẽxexũ na nüxũ nangupetũxũ. ²⁹ Pa Chaueneẽgũx, pemaã nüxũ chixu rũ tama muxũ i ngunexũ tüxũ nangẽxma na naxũxũcẽx i Tupanaãrũ puracũ. Rũ ngẽmacẽx ya yĩxema ixãmẽxgũxe rũ name nixĩ i meã tanaxũgũ i Tupanaãrũ puracũ ñoma tangemẽxgũxũrũ. ³⁰ Rũ yĩxema ngexwaca yutanũgũxe rũ yixema peta ũgũxe rũ yĩxema itaxegũxe, rũ tama name i ngẽmacẽx Tupanaãrũ puracũ na ítangẽxgũxũ. ³¹ Rũ yĩxema tüxũ nangẽxmaxẽ i tũmaãrũ ngẽmaxũgũ i ñoma i naãnewa, rũ tama name i ngẽmacẽx Tupanaãrũ puracũ na ítangẽxgũxũ. Erũ ñoma i naãne i ñuxma nüxũ idauxũ

rü paxa tá nagux. ³² Rü tama chanaxwèxe na tacücèx pexoegaãègüxü. Rü ngëxguma wüxi i yatü ngemèxgu, rü Tupanaärü puracügu narüxĩnü rü nagu narüxĩnü na ñuxäcü Tupanaärü ngúchaũ naxüxü. ³³⁻³⁴ Natürü ngëxguma naxãmèxgu ya wüxi ya yatü, rü ñoma i naãneärü ngëmaxũgu narüxĩnü rü nagu narüxĩnü na ñuxäcü namèxü nataãèxèèxü. Rü ngëmaäcü muxũgu narüxĩnü. Rü ngëxgumarüũ ta nixĩ i ngexũgü. Rü ngëma ngexü i ngetexü rü Tupanaärü puracügu narüxĩnü, erü marü Tupanana nügü naxã rü guxü i naxünemaã rü naãemaã naxcèx namaxü. Natürü ngëma ngexü i ätexü rü ñoma i naãneärü ngëmaxũgu narüxĩnü, rü nagu narüxĩnü na ñuxäcü natexü nataãèxèèxü. ³⁵ Rü perü mexücèx nixĩ i pemaã nüxü chixuxü i ngëma, rü tama pexna na chanachuxuxüçèx nixĩ. Natürü ngëma ñacharügü na meã pemaxèxüçèx rü aixcüma penaxüxüçèx i tórü Coriarü puracü. ³⁶ Rü ngëxguma texé nagu rüxĩnügu na tümaxäcü rü marü na napaxü, rü tümacèx namexgu na naxätexü, rü marü name i ngixü taxüte ega aixcüma tümacèx namexgu. Rü ngëma na naxätexü i tümaxäcü rü tama pecadu nixĩ. ³⁷ Natürü ngëxguma wüxi i yatü nüxü nangëxmagu i norü pacü rü tama nanaxwèxegu na ngixü naxütexü, rü ngëma rü ta marü name. Erü naxmèxwa ingëxma rü taxucèxma texé tanachixewe na ngixü naxütexüçèx. ³⁸ Rü ngëmawa nüxü tadau rü ngëma yatü i naxäcü ngixü ütèxü rü mexü naxü. Rü ngëma yatü i tama naxäcü ngixü ütèxü rü yexeraxü i mexü naxü. ³⁹ Rü wüxi i nge i ätecü rü ngitemèxèwa ingëxma i ngëxguma namaüxgu ya ngite. Natürü ngëxguma nayuxgu ya ngite, rü marü name ega to i yatü i ngĩma

ngĩxũ ngũchaũxũmaã naxãtegu. Natürü inaxwèxe na wüxi ya yatü ya yaxõcümaã naxãtexũ. ⁴⁰ Natürü chauxcèx rü yexeraãcü chi itaãẽ i ngëxguma chi tãũ chima wena naxãtegu. Rü ngẽma ore rü choxrütama nixĩ, natürü nagu charũxĩnũ rü Tupanaãẽ i Üünexũãrũ ñnũ ta nixĩ.

8

Tupananchicünèxãgũna naxuaxũgũxũ ga õnachiga

¹ Ñuxma rü tá pemaã nüxũ chixu i nachiga i ngẽma õnagü i ngẽma duũxũgü i tama Ngechuchuaxũ yaxõgũxũ norü tupananetchicünèxãgũna uaxũgũxũ. Rü aixcüma nixĩ i wüxichigü i yixema i meãma nüxũ icuáxũ i ngẽmachiga. Natürü ngẽma nüxũ na icuáxũgagu rü ñuxguacü rü yigü namaã ticuèxũxũ. Natürü ngẽma na yigü ingechaũxũ rü tüxũ narüngũxẽẽ na yexeraãcü meã yaxõgũchigũxũ. ² Rü ngëxguma chi texé nagu rüxĩnũgu na țacũxũ tacuáxũ, rü name nixĩ i nüxna tacuèxãchi na ngëxguma rü ta tama aixcüma nüxũ tacuáxũ i guxũma i ngẽma cuèx i aixcüma ixĩxũ. ³ Natürü ngëxguma texé aixcüma Tupanaxũ ngechaũgu, rü Tupana rü tüxũ nacuèx ya yixema. ⁴ Rü ngẽma na nangõxũ i ngẽma õnagü i tupananetchicünèxãgũna naxuaxũgũxũ i duũxũgü, rü meãma nüxũ tacuèx na taxuwama namexũ i ngẽma tupananetchicünèxãgü erü tama aixcüma Tupanaxũchi nixĩgü. Erü wüxixicatama nixĩ ya aixcüma Tupana ixĩcü, rü nataxuma ya naĩ. ⁵ Rü woo duũxũgü nagu narũxĩnũe rü nangexma i muxũma i tupanagü i ñoma i naanewa rü dauxũgũxũ i naanewa, natürü taxcèx rü tama ngemaãcü nixĩ. ⁶ Erü yixema nüxũ tacuèx na wüxitama yixĩxũ ya Tupana ya Tanatü ixĩcü. Rü nüma ya Tanatü nixĩ i naxũãxũ i guxũma i țacü i ngëxmaxũ, rü naxcèx nixĩ

i imaxēxū i yixemax. Rū ngēxgumarūū ta nangēxma i wūxitama ya tórū Cori ya Ngechuchu ya Cristu. Rū yimagagu nixī na nangēxmaxū i guxūma, rū yimagagu nixī i tūxū nangēxmaxū i maxū. ⁷ Natūrū tama guxūma i yaxōgūxū nūxū nacuèx na nangēxmaxū ya wūxitama ya Tupana rū wūxitama ya tórū Cori. Rū ñuxre i nūmagū ga ūpa rū nūxū nayapue na nūxū yaxōgūāxū i ngēma tupanetachicūnèxāgū, rū ñuxma rū ta tama aixcūma nūxū nacuèxgū i ngēma mexū i Tupana nūxū naxwèxexū. Rū ngēmacèx nixī i ñuxma i nagu naxīnūēxū na chixexū naxūgūxū i ngēxguma nangōxgūāgu i ngēma naxūnamachi i togū i duūxūgū norū tupanetachicūnèxāgūna uaxūgūxū na nūxū namaā yacuèxūūgūxūcèx. ⁸ Rū yixema nūxū tacuèx na tama tacū rū namachi na ingóxūgagu yīxū na Tupana tūxū dexū. Rū tāūtāma yexera time i napéxewa ega nangōxgūgu i ngēma namachi. Rū tāūtāma yexera tichixe i napéxewa ega tama nangōxgūgu. ⁹ Natūrū i pema i nūxū na pecuáxū na tama pecadu yīxū na nangóxū i ngēma namachi, ꝑrū pexuāēgū erū ngūrūāchi ngēma na pengóxūgagu chixexūgu tá penayixēē i ngēma peeneēgū i tauta aixcūma meā nūxū cuèxgūxū na tacū yīxū i Tupana nūxū naxwèxexū! ¹⁰ Erū cuma na meā Tupanaxū cucuáxū, rū ngēxguma chi cunangōxgu i ngēma namachi i ngextá tupanetachicūnèxāgūxū iyacuèxūūgūxūwa, rū ngūrūāchi wūxi i cueneē i tauta meā Tupanaxū cuáxū tá cuxū nadau. Rū ngūrūāchi nūma rū tá ta nanangōx i ngēma namachi woo naāēwa nagu naxīnūgu na wūxi i chixexū yīxū na nangóxū i ngēma namachi. ¹¹ Rū ngēmaācū i cuma na meā Tupanaxū cucuáxū,

rü tá icuyanatauxẽẽ i ngẽma cueneẽ i Cristu naxcèx yuxũ i tauta meã Tupanaxũ cuáxũ. ¹² Rü ngẽmacèx i ngẽxguma chixexũgu cunanguxẽẽxgu i ngẽma cueneẽ i tauta meã Tupanaxũ cuáxũ, rü Cristumaã rü ta chixexũ cuxü. ¹³ Rü ngẽmacèx i ngẽxguma ngẽma namachi i changóxũgagu chixexũgu chananguxẽẽxgu i chaueneẽ, rü narümemaẽ nixĩ i noxtacüma taguma namachi changõx na tama pecadugu chananguxẽẽxücèx i ngẽma chaueneẽ.

9

Yíxema Cristu tüxũ muxẽ na nüxũ tapuracüxücèx, rü tüxna naxü i tümaãrü natanü

¹ Rü pemaã nüxũ chixu rü tórü Coritama nixĩ ya choxũ yaxucü rü choxũ mucü na norü puracü chaxüxücèx, rü ngẽmacèx taxuũma i duũxũgüméxẽwa changẽxma i ñuxmax. Rü chomatama chauxetümaã tórü Cori ya Ngechuchuxũ chadau, rü ngẽma puracü i nüxũ chaxüxũgagu nixĩ i peyaxõgüxũ i pemax. ² Rü woo togü i duũxũgü tama choxũ cuèxgüchaũgu na tórü Cori choxũ muxũ, natürü i pema rü meãma nüxũ pecuèx na nüma yiixũ ga choxũ namuxũ. Yerü chauxütawa nixĩ ga tórü Coriaxũ peyaxõgüxũ, rü ngẽmawa nüxũ pecuèx na aixcüma yiixũ na nüma choxũ namuxũ. ³⁻⁴ Rü ñaã nixĩ i chorü dexa i namaã chanangãxüxü i ngẽma duũxũgü i chauchiga idexagüxũ:

“¿Éxna tama name na duũxũgü choxna naxãxü i chorü õna rü chorü axexũ naxcèx i chorü puracü? ⁵ ¿Éxna tama inamexü ta na wüxi i ngexü i yaxõxũmaã na chaxãmaxü na chayagaxücèx ngẽxgumarüü na naxãmaxü i Pedru, rü naẽneẽgü ya tórü Cori, rü ngẽma togü i yatügü i

Tupana imugüxũ? ⁶ ¿Rü éxna pema nagu perüxĩnũegu rü choḡa rü Bernabéxcatama i tama namexũ na toxũ perüngüxéégüxũ ngẽma togü i orearü uruüügüxũ na perüngüxéégüxũrüü? ⁷ ¿Tacü rü duũxũ i churarawa üxũ i nügüxũtama naxütanüxũ i norü õna? ¿Rü tacü rü duũxũ i orix itoxũ i tama namúxũ i norü o? ¿Rü tacü rü duũxũ i carnerugüna dauxũ i tama nagünenixũ ne ixaxüxũ?” Ngẽma ñacharügü nüxũ i ngẽma duũxügü i chauchiga idexagüxũ. ⁸ ¿Rü ñuxma rü tãütama nagu perüxĩnũe na chorü orexicatama yĩxũ i ñaã nüxũ chixuxũ! Erü Tupanaärü ore ga Moĩché ümatüxüwa rü ta ngẽma ñanagürü. ⁹ Erü ngẽma ore rü ñanagürü:

“¿Rü ngẽma woca i aruchuarü putéxewa puracüxũ, rü tãütama cunawëxnagu na tama yima aruchuwa nachibüxüçè!”

ñanagürü i ngẽma ore. Rü nüxũ tacuèx na tama wocagügu naxĩnüxũ ga Tupana ga yexguma yema ñaxgu. ¹⁰ Natürü pemaã nüxũ chixu rü tagu nixĩ ga naxĩnüxũ ga yexguma yema ñaxgu ga Tupana. Rü tachiga nixĩ ga naxümatüxũ ga yema ore. Erü yixema aruchunecü úxe rü yixema norü oarü puxwa puracüxe, rü ngëxguma tapuracüeyane rü tanaxwèxegü na ítanangüxéégüxũ i ngẽma norü o i tüxna üxũ. ¹¹ Rü toma rü wüxi ya nanetüchire ya itatoxünerüü tixĩgü ga yexguma pemaã nüxũ tixuxgu ga Tupanaärü ore. ¿Rü ñuxma rü tama éxna i pexçè namexũ na toxna penaxãxũ i tacü i toxũ taxuxũ? ¹² Rü ngëxguma ngẽma togü i orearü uruüügü petanüwa nayauxgügu i ngẽma nüxũ taxuxũ, rü maneca toma rü yexera name nixĩ i petanüwa tanayaxu i ngẽma toxũ taxuxũ. Natürü i toma rü tama ngẽmaãcü tanaxü.

Erü toma rü guxũ i guxchaxũmaã taporae na tama pexũ tanaguxchaxẽẽxũcèx na Cristuaxũ peyaxõgũxũ. ¹³ Pema nüxũ pecuèx rü guxũma i duũxũgũ i tupauca ya taxũnewa puracüexũ, rü ngẽma õna ya yima tupaucawa ngẽxmaxũtama nangõxgũ. Rü ngẽma duũxũgũ i tupaucagu Tupanacèx naxũnagũ dèixũ, rü nanade i ñuxre i ngẽma namachi norü ngõxruũ. ¹⁴ Rü ngẽxgumarũũ ta ya yixema nüxũ ixugũxe i ore i tüxũ maxẽẽẽxũ, rü tórü Cori nüxũ nixu rü name nixĩ i tanayauxtani i ngema tũmaarü puracü.. ¹⁵ Natürü i choma rü taguma ngẽmaãcü chanaxü. Rü ñuxma na pexcèx chanaxumatüxũ i ñaã popera, rü tama tacü choxna pexãxũcèx nixĩ. Erü ngẽma na taguma texéxũtawa tacücèx íchaçaxũ, rü wüxi i chorü taã nixĩ. Rü narümemaẽ chierü nixĩ na chayuxũ naxũpa na texé choxna nayaxuxũ i ñaã taã i choxũ ngẽxmaxũ. ¹⁶ Rü ñuxma na nüxũ chixuxũ i ngẽma ore i tüxũ maxẽẽẽxũ, rü taguma ngẽmacèx chaugü chicuèxũũ. Erü woetama ngẽma nixĩ i chorü puracü ga Tupana choxna ãxũ, rü ngẽmacèx taxucürüwama chanangexrü. Erü poraãcü chi chachixexũgu i ngẽxguma tãũ chima nüxũ chixuxgu. ¹⁷ Rü ngẽxguma chi chaugagu chitama chanaxũxgu i ngẽma puracü, rü nagu chi charüxĩnü na choxũ naxãtanüxũ. Natürü ngẽxguma Tupana choxũ muxũãcüma chanaxũxgu, rü chanaxüama erü woetama ngẽma nixĩ i chorü puracü ga Tupana choxna ãxũ. ¹⁸ ¿Rü ñuxma rü tacü tá nixĩ i chorü natanü naxcèx i ngẽma puracü i chaxüxũ? Rü dücax, rü chorü natanü nixĩ i ngẽma taã i chayaxuxũ i ngẽxguma ngetanüãcüma nüxũ chixuxgu i ngẽma ore i tüxũ maxẽẽẽxũ. Rü ngẽmaãcü woo Tupanapèxewa

name na petanüwa chanayaxuxũ i chorü natanü na ngēmamaã chamaxũxũcèx, natürü taguma texena naxcèx chaca.. ¹⁹ Rü woo taxúxeméxêwa changêxma i chomax, natürü guxâméxêwa chaugü changêxmaxêê, na ngēmaãcü yexeraãcü muxũma i duũxũg üxũ charüngũxêxũcèx na Cristuaxũ yaxögüãxũcèx. ²⁰ Rü ngêxguma chautanüxũ i Yudíugütanüwa changêxmagu, rü namaã chaugü chawüxiguêê na ngēmaãcü nüxũ charüngũxêxũcèx na Cristuaxũ yaxögüãxũcèx. Rü woo tama yema Moiché ümatüxũ ga mugütüüwa changêxmagu, natürü chayanguxêêama i ngēma mugü na ngēmaãcü Cristuxütawa chanagagüxũ i ngēma duũxũgü i ñuxma rü ta nagu íxũ i ngēma mugü ga Moiché ümatüxũ. ²¹ Rü ngêxguma natanüwa changêxmagu i ngēma duũxũgü i tama Yudíugü ixígüxũ, rü ngēma duũxũgümaã chaugü chawüxiguxêê na ngēmaãcü nüxũ charüngũxêxũcèx na Cristuaxũ yaxögüãxũcèx. Natürü taguma íchanangéx i Tupanaãrü mugü erü guxũguma Cristuarü mugütüüwa changêxma. ²² Rü ngêxguma natanüwa changêxmagu i ngēma duũxũgü i tama poraãcü Cristuchigaxũ cuèxgüxũ, rü choma rü ta ngēma duũxũgümaã chaugü chawüxiguxêê, na ngēmaãcü nüxũ charüngũxêxũcèx na Cristuaxũ yaxögüãxũcèx. Rü ngēmaãcü guxũma i duũxũgürüü chaugü chixixêê, rü nagúxũraũãcüma naxcèx chadau na ngēmaãcü düxwa Tupanaxütawa chanagagüxũcèx i ñuxre i nümagü. ²³ Rü ngēmaãcü nixĩ i chapuracüxũ na guxũwama nanguxũcèx i ngēma ore i tüxũ maxêxêxũ. Erü chanaxwèxe na choma rü ta choxũ nangêxmaxũ i ngēma maxũ i taguma gúxũ,

naxrüü i guxüma i ngẽma duũxügü i nüxü yaxõgüxü.
²⁴ Pema rü meãma nüxü pecuèx i wüxi i inüca i nawa
 iñaãchixü rü muxüma inaxüãchi, natürü wüxixicatama
 nixĩ i ngẽma nüxira ínguxü rü nayaxuxü i norü ãmare. Rü
 name nixĩ i pegüna pedau na Tupana pexna naxãxücèx
 i ngẽma perü ãmare. ²⁵ Guxüma i ngẽma duũxügü i
 nügü ngúexëxü naxcèx i wüxi i inüca na toguegüxü
 naporamaexücèx, rü meã nügüna nadaugü na ngẽmaãcü
 nayauxgüãxücèx i norü ãmare i paxaãchirüü ixixü.
 Natürü yixema na yaxõgüxü rü yigüna tadaugü na meã
 naxügüxücèx rü meã imaxëxücèx na nayauxgüxücèx i
 tórü ãmare i taguma gúxü. ²⁶ Rü ngẽmacèx i choma rü
 tama ñoma chauechitamare chiñaxürüü chixĩ, rü tama
 ñoma țacü i nügü dëixü i ngürüanegumare idagüxürüü
 chixĩ. ²⁷ Rü ngẽmacèx meã chaugümaã ichacuèx na
 taxuüma i chaxuneärü ngúchaü chaxüxücèx. Erü tama
 chanaxwèxe i mexümaã togüxü changuxëëchirëxãcüma
 chixexü chaxü rü ngemagagu tama chanayaxu i chorü
 ãmare.

10

Nayaxucuxëgü na tama nüxü yacuèxüügüxücèx i tu-
 pananetachicünèxãgü

¹ Pa Chaueneëgüx, chanaxwèxe i nüxna pecuèxãchie
 ga țacü nüxü na ngupetüxü ga yema nuxcümaügüxü ga
 tórü oxigü ga Moïchéwe rüxixü. Rü pema nüxü pecuèx rü
 yexguma nawe naxixgu rü wüxi ga caixanexü napéxegu
 nixü rü nayadüxü. Rü guxüma ga yema duũxügü rü
 wüxigu Moïchémaã natüügu nixixütanü. Rü yexgumarüü
 ta Moïchémaã nawa nichoü ga yema Taxtü ga Dauchiüxü.

² Rü guxüma ga yema duũxügü rü yexguma wüxigu

Moïchémaã yema caixanexũpechitatũũgu yaxĩxũtanũgu rũ yema Taxtũ ga Dauchiũxũwa yachoũgu, rũ yemaãcũ nũgũ nangoxẽẽgũ na Moïchéweama naxĩxũ. ³ Rũ yexgumarũũ ta ga guxũma ga yema duũxũgũ nanangõxgũ ga yema pãũ ga daxũwa rüyixũ. ⁴ Rũ guxũma ga yema duũxũgũ nayaxaxgũ ga yema dexá ga Cristu nũxna ãxũ. Yerũ Cristu rũ yema duũxũgũxũ ínixũmũcũ ga yema ínaxĩxũwa, rũ nũxna nanaxã ga yema dexá ga yaxaxgũxũ. ⁵ Natũrũ narũmumaẽ ga yema duũxũgũ ga tama Tupanaãrũ ngũchaũ ũgũxũ. Rũ yemacèx ga yema duũxũgũ rũ yexma nayue rũ yema nawogũ ga naxũnegũ ga dauxchitawa ga taxúema íxãpataxũwa. ⁶ Rũ guxũma ga yema nangupetũ na tórũ cuèxruũ yĩxũcè rũ tama tórũ oxigũrũxũ chixexũcèxama idaugũxũcèx. ⁷ Rũ ngẽmacèx tama name i nũxũ picuèxũũgũ i ƭacũ rũ tupanetachicũnèxãgũ, yexgumarũũ ga ñuxre ga nũmagũ naxũgũxũrũũ. Erũ Tupanaãrũ ore i ũmatũxũwa rũ tórũ oxigũchigaxũ nixu rũ ñanagũrũ:

“Rũ duũxũgũ ínarũtogũ na nachibũexũcèx rũ na naxaxegũxũcèx, rũ ngẽmawena rũ inachigũ na íyayũxexũcèx”,

ñanagũrũ i ngẽma ore. ⁸ Rũ tama name i yixema rũ naĩ i ngemaã itape yexgumarũũ ga ñuxre ga nũmagũ naxũgũxũrũũ. Rũ yemacèx wũxitama ga ngunexũgu rũ nayue ga 23,000. ⁹ Rũ tama name i nũxũ taxũ ya tórũ Cori na ñuxãcũ yaxna tamaã naxĩnũxũ yexgumarũũ ga ñuxre ga nũmagũ naxũgũxũrũũ. Rũ yemacèx nixĩ ga yema duũxũgũxũ nangõxcuxũ ga ãxtapegũ rũ nayuexũ. ¹⁰ Rũ tama name i chixexũ Tupanamaã pixugũ yema ñuxre ga nuxcũmaũgũxũ ga tórũ oxigũrũũ. Rũ yemacèx ga Tupanaãrũ orearũ ngerũũ ga daxũcũãx rũ

nanadai. ¹¹ Rũ guxũma ga yema nuxcũmaxũgũxũ ga duũxũgũxũ ngupetũxũ, rũ ñomaxũcüü rũ tórũ cuèxruũ nixĩ. Rũ naxũmatũ na ngẽmawa nũxũ icuáxũcèx na ñuxãcü Tupana naxwèxexũ na imaxèxũ i yixema i ño-
maũcüü. ¹² Rũ ngẽmacèx ya yixema tũgũgu rũxĩnũxẽ na taporaxũ i Tupanapèxewa, rũ name nixĩ na meã tũgũna tadauxũ na tama chixexũgu tanguxũcèx. ¹³ Rũ ñuxma rũ ta taguma pexcèx ínangu i ngúchaxũ i chixexũ i taxucürüwama namaã yaxna pexĩnüexũ. Rũ name nixĩ i Tupanana perũyoũ erũ nüma rũ aixcũma nayanguxẽẽ i ngema tamaã inaxunetaxũ rũ taxũtãma nawa pexũ nawogũ i ngúchaxũgũ i taxucürüwama yaxna namaã pexĩnüexũ. Natürü ngexguma tá ngúchaxũgũ i chixexũ pexcèx ínguxgu rũ nüma rũ tá pexũ ínapoxũ na tama nagu peyixũcèx. ¹⁴ Rũ ngẽmacèx, Pa Chaueneẽgũ ya Pexũ Changechaũgũxex, ¡rũ nũxũ perũxoe i ngema nacũmagũ i tupananetachicũnèxãgũcèx naxũgũxũ i ngema duũxũgũ i tama yaxõgũxũ! ¹⁵ Pemaã nũxũ chixu i ngẽma ore, erũ chauxcèx rũ duũxũgũ i nũxũ cuáxũ pixĩgũ. Rũ pema tátama nagu perũxĩnüẽ i ngẽma pemaã nũxũ chixuxũ. ¹⁶ Rũ ngẽxguma õna i üünexũcèx ingutaquẽxegũgu, rũ yaxaxgũgu ya yima binu ya üünecü rũ moxẽ naxcèx ixãgũgu, rũ ngẽmaãcü yigũ tangoxẽẽ na Cristu ya taxcèx nagũ ibacũwe rũxĩxũ. Rũ ngẽxguma nangõxgũgu i ngẽma pãũ i ibücuxũ, rũ ngẽmaãcü yigũ tangoxẽẽ na Cristu ya taxcèx naxũne ixãcüwe rũxĩxũ. ¹⁷ Rũ woo na imuxũ i yixema, natürü wũxitama i pãũ tangõxgũ. Rũ ngẽmaãcü nixĩ i wũxitama ixĩgũxũ erũ wũxiwetama tarũxĩ. ¹⁸ ¡Rũ dũcax i ngẽma Yudĩugũ i nangõxgũxũ i ngẽma naxũna-
machi i Tupanacèx nadèixũ! Rũ ngẽxguma wũxigu nügũ-

maã nangõxgüãgu, rü guxüma i ngẽma nangõxgüxü rü ngẽmaãcü nügu nangõxẽẽ na wüxigu Tupanawe naxixü. ¹⁹ Rü ñuxma na ngẽma ñachaxü, rü tama chanaxwexe i nagu perüxĩnüẽ na naxüünexü i ngẽma namachi i ngẽma duüxügü i tama yaxõgüxü norü tupananetachicünèxãcèx dèixü. Rü tama chanaxwexe i nagu perüxĩnüẽ na tacüwa namexü i ngẽma norü tupananetachicünèxãgü, erü nangearü maxüãx. ²⁰ Natürü pemaã nüxü chixu rü ngëxguma ngẽma duüxügü i tama Tupanaxü cuèxgüxü, norü tupananetachicünèxãcèx nadaiãgu i tacü rü naxüna, rü tama Tupanacèx nixĩ i nadaiãxü, natürü ngoxogücèx nixĩ i nadaiãxü. Rü tama chanaxwexe i ngoxogütanüxüxü pegü pixigüxẽẽ. ²¹ Rü pema na peyaxaxgüxü ya yima binu ya tórü Corixü namaã picuèxüügücü rü taxucürüwama namaã pexãmücü i ngẽma duüxügü i Chatanáwe rüxixü. Rü pema na tórü Coriarü mechawa penangóxü i ngẽma õna i nüxü namaã picuèxüügüxü rü taxucürüwama ngẽma duüxügü i Chatanáwe rüxixüãrü mechawa peyachibüe. ²² ¿Rü ñuxü ñapegüxü i ñuxmax? ¿Éxna penanuxẽẽchaü ya tórü Cori? ¿Éxna pexcèx rü nüxü tarüporamaëgü i yixemax?

Name nixĩ i taeneëarü mexüc èx tadaugü rü tama i tóxrütama

²³ Pema rü ñaperügügü:

“Marü name na tanaxüxü i tacü i tanaxwèxegüxü”, ñaperügügü. Rü aixcüma nixĩ i ngẽma, natürü tama tüxü name i guxüma i ngẽma ixüxchaüxü. Rü ngẽmaãcü Cristu tüxü ínanguxüxẽẽ na naxüüçèx i ngẽma inaxwèxexü, natürü tama guxüma i ngẽma ixüxü tüxü narüngüxẽẽ na yexeraãcü meã yaxõgüamachigüxüçèx. ²⁴ Rü tama name

nixĩ i tóxrütama mexũcèx tadaugü, natürü name nixĩ i togüarü mexũcèx tadaugü. ²⁵ Rũ marü name i penangõx i nagúxũraũxũ i namachi i namaã nataxegũxũ, natürü taxucèxma tũxcüũ naxcèx ípeca ngoxi marü tupanane-tagũxũ namaã yacuèxũgũgũxũ i namachi yixĩ. ²⁶ Erü ñoma i naãne rü guxũma i nawa ngẽxmaxũ, rü tórü Cori ya Tupanaarü nixĩ. ²⁷ Rũ ngẽxguma chi wüxi i duũxũ i tama yaxõxũ pexna uxgu na naxũtawa peyachibüexũcèx, rü chi ngema pexĩxgu, rü marü name i penangõx i guxũma i õna i pepéxegu yaxüxüchixũ. Rũ taxucèxma tũxcüũ naxcèx pexoegaãẽ rü nüxna peca na ngextá ne naxũxũ i ngẽma namachi i pemaã nangóxũ. ²⁸ Natürü ngürüächi wüxie tá pemaã nüxũ tixu rü ñatarügü:

“Ñãã namachi rü tupananetachicünèxãcèx yamèxgũxũ i naxũnawa ne üxũ nixĩ”, ñatarügü. Rũ ngẽxguma i pema rü tama name na penangóxũ i ngẽma namachi na tama chixexũgu tũxũ penguxẽèxũcèx ya yíxema pemaã nüxũ ixuxe, rü tama ngẽmacèx taxoegaãèxũcèx i tümax. ²⁹ Rũ tama pechiga nixĩ i chidexaxũ i ngẽxguma:

“Na tama taxoegaãèxũcèx”, ñachagu. Natürü yíxema pemaã nüxũ ixuchiga nixĩ i chidexaxũ. Natürü bexmana ngürüächi wüxi i yaxõxũ tá cuxna naca rü ñanagürü tá cuxũ:

“¿Tũxcüũ i togü naxcèx oegaãèxũgagu choxna cunachuxu na tama chanaxũxũ i tacü i chanaxwèxexũ? ³⁰ Rũ ngẽxguma chi Tupanana moxẽ chaxãxgu naxcèx i ngẽma õna i changóxũ, ¿rü tũxcüũ i ngẽma õnacèx choxũ quixu?” ñanagürü. ³¹ Dücèx, pemaã nüxũ chixu rü name nixĩ i guxũma i ngẽma pexũxũmaã Tupanaxũ picuèxũgũgü. Rũ ngexguma tacü pengõxgügu rü exna

tacü pixaxgügu rü éxna tacü i to pexügügu, rü name nixĩ i ngēmamaã Tupanaxũ picuèxüxũgü. ³² Rü tama name i penaxü i tacü i togüxũ chixexũgu yixëxũ, rü woo Yudfugü yixĩgügu rü éxna tama Yudfugü yixĩgügu, rü éxna yaxögüxũ yixĩgügu. ³³ Rü choma rü guxũwama guxũxũma chataãxëxchaxũ. Rü ngemacèx tama chanaxü i ngema chomatama namaã chataãxëxũ, natürü chanaxü i ngema togü namaã taãxëxũ na ngemaäcü nümagü rü ta nuxũ nangúchaxũ na yaxögüãxũ rü nayauxgüãxũ i maxũ i taguma gúxũ.

11

¹ Rü name nixĩ i nagu pexĩ i chaucüma ngëxgumarüũ i choma na Cristucümagu chixüxürüũ.

Name nixĩ i ngexũgü rü mexü i nacümagu naxĩ

² Pa Chaueneëgüx, pemaã chataãë erü guxũguma chaugu perüxĩnũë rü nagu pexĩ ga yema nguxëetae ga pexũ changúxëxũ. ³ Natürü chanaxwëxe i nüxũ pecuèx na Cristu rü wüxichigü i yatüeru na yiixũ. Rü yatüxũgü rü naxmëxëru nixĩgü ngëxgumarüũ ya Tupana rü Cristueru na yiixũ. ⁴ Rü ngëmacèx i ngëxguma wüxi ya yatü ngutaquéxewa yumüxëgu rü éxna Tupanaärü orexũ yaxuxgu, rü tama ínangèxüchipatéxegu, rü ngëma rü wüxi i chixexũ nixĩ i Cristupéxewa naxüxũ. ⁵ Natürü ngëxguma chi wüxi i ngecü ngutaquéxewa yumüxëgu rü éxna Tupanaärü orexũ yaxuxgu, rü chi tama ngĩgü natüerugu, rü ngëma rü wüxi i chixexũ nixĩ i ngítepéxewa naxüxũ. Rü ñoma ngĩgü yadüeruxürüũ iyixĩ. ⁶ Erü ngëxguma chi tama ngĩgü natüeruchaũgu, rü narümemae nixĩ i noxtacüma ngĩgü ibèixeru. Natürü ngëxguma chi

wüxi i ngîrû âne yixîgu i ngêma na ngîgü nabèixeruxü rü éxna ngîgü yadüeruxü, rü narümemaê nixî i ngîgü itüeru. ⁷ Natürü yatügü rü tama name na nügü natüerugüxü. Yerü ga Tupana rü nügüraüâcü nanaxü ga yatü rü Tupanachipeta nixî. Rü yima yatüwa nixî i nangóxü na ñuxâcü namexêchixü ya Tupana. Rü ngêma ngecüwa nixî i nangóxü na ñuxâcü namexü ya yatü. ⁸ Yerü yexguma noxri Tupana naxüxgu ga yatü, rü tama ngecüwa nixî ga naxüâxü. Rü ngîma waxi nixî ga yatüwa ngîxü naxüxü. ⁹ Rü yatücèx nixî ga Tupana ngîxü üxü ga ngecü, rü tama ngecüçèx nixî ga Tupana naxüxü ga yatü. ¹⁰ Rü ngêmacèx name nixî i ngîgü itüeru na duüxügüpéxewa rü Tupanaârü orearü ngeruügü i daxücüâxgüpéxewa nangóxücèx na ngîteméxêwa nangêxmaxü. ¹¹ Natürü Tupanapéxewa rü taxuüma nixî ya yatü ega natauxgu i ngecü. Rü ngêxgumarüü ta i ngecü rü taxuüma iyixî ega natauxguma ya yatü. ¹² Yerü yexguma noxri Tupana ngîxü üxgu ga ngecü, rü yatüwa nixî ga ngîxü naxüxü. Rü ngêxgumarüü ta ya yatü rü ngecüwa nixî i nabuxü. Natürü Tupana nixî ya naxücü i guxüma i duüxügü. ¹³ Rü pematama tá penangugü rü ngoxi name na wüxi i ngecü rü tama ngîgü natüeruâcüma nayumüxêxü. ¹⁴ Rü woetama tórü bucüma nixî i nüxü na icuáxü na wüxi i âne yîxü na nügü namèxyaexêxü i wüxi i yatüxü. ¹⁵ Natürü ngecüçèx rü wüxi i mexêchixü nixî na namèxyaexü. Erü Tupana rü ngîxna nanaxâ i ngîyae na ngêmamaã ngîgü natüeruxücèx. ¹⁶ Natürü ngêxguma chi texé ngêmachiga tügü choxügagügu, rü name nixî i nüxü tacuèx na ngêmatama yîxü i tacüma rü nacüma i guxüma i yaxögüxü i guxünema ya tupaucagüwa.

Duĩxũgũ rũ chixri namaã inacuèxgũ ga Coriarũ òna i üünexũ

¹⁷ Rũ ñuxma i ñaã popera i pexcèx chaxümatüxũwa rũ pemaã nüxũ chixu rũ nangèxma i wüxi i pecüma i chixexũ i tama namaã chataãèxũ. Erũ chauxcèx i ngẽma perũ ngutaquéxegũ rũ pexũ nachixexẽẽ, rũ tama aixcüma perũ meruũgũ nixĩ. ¹⁸ Erũ duĩxũgũ chomaã nüxũ nixugũgũ rũ ngèxguma tórũ Coricèx pengutaquéxegũũxgu rũ pegũ pitoye. Rũ ngãxũgu chayaxõ na aixcüma yĩxũ i ngẽma nüxũ yaxugũgũxũ. ¹⁹ Choma rũ nüxũ chacuèx na aixcüma woe tátama yĩxũ i pegũ pitoyexũ na ngẽmawa nüxũ icuáxücèx na texégũ tiĩxũ ya yíxema aixcüma Cristuarũ duĩxũgũ ixĩgũxe. ²⁰ Rũ ngẽma pegũ na pitoyexũgagu nixĩ na tama aixcüma tórũ Corixũ picuèxüũgũácüma yĩxũ i penangóxũ i tórũ Coriarũ òna i Üünexũ i ngèxguma pengutaquéxegũũxgu. ²¹ Erũ ngèxguma penangõxgu i ngẽma òna i Üünexũ rũ wüxichigũ rũ peñuxãègũ na pexira na penayaxuxücèx i ngẽma òna. Rũ yoxni i ngẽma togũ rũ ngèxma nataiyae, rũ togũ rũ nayaxxgũ ya binu ñuxmata nangãxẽ. ²² ¿Éxna pengechiũgũ ecèx tama ngema pechibüexũ rũ pexaxegũxũ? ¿Tüxcüũ nüxũ pexoe i ngẽma togũ i yaxõgũxũ rũ penaxãneèxẽẽ i ngẽma yaxõgũxũ i ngearũ ngẽmaxũãxgũxũ? ¿Rũ tacüxũ tá pemaã chixu i ñuxmax? ¿Pexcèx rũ tá pemaã chataãèxũ? Dücèx, pemaã nüxũ chixu rũ tama pemaã chataãè naxcèx i ngẽma pexügũxũ.

Tórũ Coriarũ òna i üünexũchiga

²³ Rũ ngema ngxèètae i pemaã nüxũ chixuxũ rũ tórũ Corixütawatama chanayaxu. Rũ yexguma tórũ Cori ga Ngechuchuxũ ínaxuaxũgu, rũ yematama chütaxũgu rũ

nüma rü nanayaxu ga wüxi ga pãũ. ²⁴ Rü Tupanana moxẽ naxã, rü yemawena rü inanabücu, rü ñanagürü:

“Ñãã nixĩ i chaxune i pexcèx ichaxãxũchiga. ;Rü penangó i ñãã pãũ na ngẽmaãcü peãẽwa choxna pecuèxãchiexũcèx!” ñanagürü. ²⁵ Rü yexgumarüũ ta ga chibüwena rü Ngechuchu nanayaxu ga wüxi ga pochiyu ga binuchiümaã ããcuxũ, rü ñanagürü:

“Rü daa binu rü wüxi i cuèxruũ nixĩ na ngexwacèx Tupana duũxũgümaã ixunetaxũ i maxũ i taguma gúxũchiga. Rü chaugü ya pexcèx ibacümaã nixĩ i Tupana pexũ nüxũ cuèxẽẽxũ i ngẽmachiga. Rü ngẽxguma ñuxguacü daa binu pixaxgügu rü ñuxma choma na chanaxüxürüũ tá penaxü na peãẽwa choxna pecuèxãchiexũcèx”, ñanagürü ga Ngechuchu. ²⁶ Rü guxũguma i ngẽxguma penangõxgu i ñãã pãũ rü peyaxaxgügu ya daa binu rü ngẽmawa tá duũxũgüxũ nüxũ picuèxẽẽ na ñuxãcü tórü pecaducèx nayuxũ ga tórü Cori. Rü ngẽmaãcü tá penaxü ñuxmatáta wena nataegu i nümax.

Texegücèx nixĩ i tórü Coriarü õna i üünexũ

²⁷ Natürü ngẽxguma chi texe tama tügü tamexẽearü maxũxãcüma nangõxgu i Coriarü pãũ i üünexũ rü tayaxaxüxgu ya yima binu ya üünecü, rü pecadu taxü napewa ya tórü Cori ya taxcèx yucü rü nagü ibacü. ²⁸ Rü ngẽmacèx naxũpa na tanangóxũ i ngẽma pãũ rü na tayaxaxüxũ ya yima binu, rü name nixĩ i wüxichigü meã tümaarü maxũgu tarüxĩnü ngoxi nataxuma i tacü rü chixexũ i tümaarü maxüwa. ²⁹ Erü ngẽxguma tama tügü tamaxẽearü maxũãcüma tanangõxgu rü tayaxaxüxgu, rü tügütama poxcuwa taga. Erü tama aixcüma tayaxõ na tórü Corichiga yixĩxũ i ngema pãũ rü yima binu.. ³⁰ Rü ngẽmacèx nixĩ i muxũchixe i petanüwa rü pidaaweexũ rü

peturaexũ, rü ñuxre i togü rü marü nayuexũ. ³¹ Natürü ngëxguma chi tórütama maxũgu rüxĩnüegu naxũpa na nangóxũ i ngëma Coriarü õna, rü nũma rü taxucèx tüxũ napoxcue. ³² Natürü ngëxguma tórü Cori ñoma i tórü maxũwa tüxũ poxcugu, rü ngëmaãcü tüxũ inayarüwéxãchixẽ na tama yixcũra naãneãrü guxgu tüxũ napoxcuxũcèx wüxigu namaã i ngëma duũxũgü i tama yaxõgũxũ. ³³ Rü ngëmacèx, Pa Chaueneëgũx, ngëxguma pengutaquëxegũgu na penangóxũcèx i ngëma õna i üünexũ, name nixĩ i pegü ípenanguxẽ na guxãma wüxigu meã penangóxũcèx. ³⁴ Rü ngëxguma chi texé taiyèxgu, rü name nixĩ i tümapatawatama tachibü na tama Tupana pexũ poxcuexũcèx naxcèx na chixexũ pexüexũ i perü ngutaquëxegüwa. Rü ngëma to i guxchaxũgü i pexũ ngëxmaxũ, rü choma tá chanamexẽ i ngëxguma petanüwa chaxũxgu.

12

Ngëma cuèx i Tupanaãe i Üünexũ tüxna ãxũchiga

¹ Pa Chaueneëgũx, chanaxwèxe i nüxũ pecuèx na ñuxãcü yĩxũ i ngëma cuèx rü ñuxacü na yixĩxũ i ngema tauxcha i Tupanaãe i Üünexũ tüxna ãxũ. Rü ngëmachiga nixĩ i pemaã nüxũ chixuxchaũxũ i ñuxmax. ² Rü pema meãma nüxũ pecuèx ga yexguma tauta Cristuaxũ peyaxõgũgu, rü pegü nüxna pexãgü ga tupanane-tachicünèxãgü ga tama idexaxũ. ³ Rü ngëmacèx i ñuxma rü chanaxwèxe i meã nüxũ pecuèx rü taxucürüwama texe ya Tupanaãe i Üünexũ tümawa ngexmaxe rü chixri Ngechuchuchuga tidexa. Rü ngexgumarüxũ ta rü taxucürüwama texe ngürümare tüechama rü:

“Ngechuchu rü tórü Cori nixĩ”, ñatarügü ega tama Tupanaã i Üünexũ tüxũ muxgu na ngẽmaãcü tidexaxũcèx. ⁴ Rü nüma ya Tupana rü duũxũgüna nanaxã i naguxũraũ i tauchagü. Natürü ngema Naãxẽ i Üünexũ i nawa ne naxĩxũ i ngema tauchagü rü wüxitama nixĩ. ⁵ Nangẽxma i nagúxũraũxũ i Tupanaarü puracü, natürü yima tórü Cori ya tüxna naxãcü i ngema puracügü rü wüxitama nixĩ. ⁶ Rü Tupanaarü pora rü nagúxũraũãcü nangox. Natürü wüxitama nixĩ ya yima Tanatü ya tawa gúxũraũãcü nangoxẽcü i ngema norü puracü. ⁷ Rü ngema Naã i Üünexũ wüxixewachigü nanangoxẽ i Tupanaarü pora i norü duũxũgütanüwa na ngemaãcü guxãarü ngũxẽerũ yixĩxũcèx. ⁸ Rü Naã i Üünexũ rü tümáxena rü nanaxã i tauxcha na ucuẽxũ tacuáxũcèx. Rü ngẽmatama Naã i Üünexũ rü togueãxũ rü nanatauxchaxẽ na nüxũ tacuáxũ na mea tangúxẽẽtaexũ i Tupanaarü ore. ⁹ Rü togue rü ngẽmatama Naã i Üünexũ tüxũ nanatauxchaxẽ na Tupanana tarüyoexũcèx. Rü togue rü tüxna nanaxã i pora na ngẽmamaã naxcèx tayataanegüxẽẽxũcèx i ngema idaaweexũ. ¹⁰ Rü togue rü tüxna nanaxã i pora na tanaxũxũcèx i mexũgü i Tupanaarü poramaã üxũ. Rü togue rü tüxũ nanatauxchaẽ na nüxũ tixuxũcèx i Tupanaarü ore. Rü togue rü tüxna nanaxã i cuèx na nüxũ tacuáxũcèx i tacü yĩxũ i ngoxogüarü ixĩxũ rü tacü yĩxũ i Tupanaã i Üünexũarü ixĩxũ. Rü togue rü tüxna nanaxã i tauxcha na ngẽma tama nüxũ tacuáxũ i nagawa tidexaxũcèx. Rü togue rü tüxna nanaxã i cuèx na tanangoxẽẽxũcèx na tacüchiga yĩxũ na tidexaxũ ya yixema to i nagawa idexáxe. ¹¹ Rü guxũma i ngẽma rü Tupanaã i Üünexũtama nixĩ i naxũxũ. Rü nüma nixĩ i wüxichigü i

duĩxũna naxããxũ i ngẽma cuèx i nũma nanaxwèxexũ na nũxna naxããxũ.

Guxãma i yaxõgũxũ rũ wũxitama i naxũnewa naxũgũ

¹² Rũ duĩxũxũne rũ woo muxũgu nixũye, natũrũ wũxitama i naxũne nixĩ. Rũ ngexgumarũxũ ta i ngema Cristuãxũ yaxõgũxũ rũ woo namu, natũrũ wũxitama i naxũnewa naxũgũ. ¹³ Rũ yexguma íbaiũgu rũ Tupanaãẽ i Üünexũ rũ wũxitama i naxũne tũxũ nixĩgũxẽẽ. Rũ woo Yudũgũ na ixĩgũxũ, rũ éxna tama Yudũgũ na ixĩgũxũ, rũ woo togũméméxewa ingexmagũxũ rũ éxna taxũxeméméxewa ingẽxmagũxũ, natũrũ wũxitama i naxũne tũxũ nixĩgũxẽẽ i nũma i Naãẽ i Üünexũ i nũxicatama ixĩxũ. Rũ guxãma i yixema rũ marũ tũxna nangu i ngẽma Naãẽ i Üünexũ.

¹⁴ Wũxi i naxũne rũ tama naxãmenãxamare, natũrũ muxũgu nixũye. ¹⁵ Rũ ngẽxguma chi yima nacutũ ñaxgu:

“Rũ ñũxma na tama naxméx chiĩxũ, rũ ngẽmacèx tama ngẽma naxũnewa changẽxma”, ñaxgu, rũ tama ngẽmacèx nũxũ narũxo na ngema naxũnewa nangexmaxũ. ¹⁶ Rũ ngẽxguma chi yima naxpaxchinũ ñaxgu:

“Rũ ñũxma na tama naxètũ chiĩxũ, rũ ngẽmacèx tama naxũnewa changẽxma”, ñaxgu, rũ tama ngẽmacèx nũxũ narũxo na ngema naxũnewa nangexmaxũ. ¹⁷ Rũ ngẽxguma chi guxũma i naxũne rũ naxètũ yixĩgu, ¿rũ tacũmaã chi i nũxũ naxĩnũxũ i ngema naxũne? Rũ ngẽxguma chi guxũma i naxũne rũ naxmachixẽ yixĩgu, ¿rũ tacũmaã chi i nũxũ nawãxĩxũ? ¹⁸ Natũrũ Tupana ga naxúcũ ga taxũne, rũ ngexta nũma ínanaxwèxexũwa nanangexmaxẽẽ i taeru rũ tachacũũgũ rũ taparagũ. ¹⁹ Rũ ngẽxguma chi nataxũxgu i norũ üyechigũ i taxũne rũ chi naxãmenèxãmare. ²⁰ Rũ ngema naxũne rũ woo muxũgu

nixüye, natürü wüxitama i naxüne nixĩ. ²¹ Rũ taxetü rü taxucürüwa taxmêxũ ñanagürü:

“Choma rü tama chacuxwèxe”, ñanagürü. Rũ ngêxgumarüũ ta i taeru rü taxucürüwa tacutügüxũ ñanagürü:

“Choma rü tama chapexwèxe”, ñanagürü. ²² Natürü ngêma yexeraãcü ãücümaxũ i taxünewa, rü ngêma nixĩ i yexera nanaxwèxexũ i taxüne. ²³ Rũ ngêma taxünewa yexeraãcü naxcèx ixânexũ, rü ngêma nixĩ i yexera meã ixüxchiruxũ. Rũ ngêma taxünewa ngêxmaxũ i tama inaxwèxexũ na nangóxũ, rü ngêma nixĩ i yexera meã idüxüxũ. ²⁴ Natürü tama ngêmaãcü tanaxü namaã i ngêma taxünewa ngêxmaxũ i guxãxũma iwéxũ. Rũ ngêmaãcü Tupana nanaxü i taxüne, na yexeraãcü nüxna idauxücèx i ngêma yexera naxcèx ixânexũ. ²⁵ Rũ ngêmaãcü Tupana nanaxü i taxüne na wüxichigü i norü üye nügügu naxĩnüexücèx rü nügü nangũxêëgüxücèx. ²⁶ Rũ ngêxguma chi wüxi i ngêma taxünearü üye nüxũ ngüxgux, rü guxũma i ngêma togü i natanüxũgü rü ta nüxũ nangüx. Rũ ngêxguma chi wüxi i ngêma taxünearü üye taãëxgu, rü guxũma i ngêma togü i natanüxũgü rü ta nataãëgü. ²⁷ Rũ ñüxma i wüxichigü i pema rü Cristuxünearü üye pixĩgü, rü ngema naxünewa pexügü. ²⁸ Rũ ngêmacèx ya Tupana rü nanaxwae na ñaacü nügü inanuxũ i norü duũxũgü: Rũ yíxema tüxira tüxũ naxunetaxüxe tixĩ ya norü puracüwa tüxũ namugüxe. Rũ tüxũ naxuneta ya toguegü na nüxũ tixugüxücèx i norü ore. Rũ tüxũ naxuneta ya toguegü na duũxũgüxũ tangüxêëxücèx i norü ore, rü toguegü na tanaxügüxücèx i mexũgü i Tupanaãrü poramaã taxügüxũ. Rũ toguegü

rü tüxú nanatauxchaxêê na tanameexêêxúcèx i idaaweexú, rü toguegü na nüxú tarüngüxêêgüxúcèx i ngema tacü nüxú taxuxú, rü toguegü yaxögüxúârü âêxgacügü na tixígüxúcèx. Rü tüxú nanatauchaxêê ya toguegü na ngêma naga i tama nüxú tacuáxúwa tidexagüxúcèx. ²⁹ Rü tama guxâma Tupana tüxú imugüxe tixígü, rü tama guxâma Tupanaârü orearü uruú tixígü. Rü tama guxâma norü orewa ngüxêetaegüxe tixígü, rü tama guxâma nüxú tacuèx na tanaxüxú i mexügü i taxügü i Tupanaârü poramaã üxú. ³⁰ Rü tama guxâma nüxú tacuèx na tanameêxêêxú i duüxügü i idaaweexú. Rü tama guxâma nüxú tacuèx na nawa tidexagüxú i wüxi i naga i tama nüxú tacuáxú. Rü tama guxâma nüxú tacuèx na tanangoxêêxú na tacüchiga yadexaxú i ngêma duüxügü i tama nüxú nacuáxú i nagawa idexaxú. ³¹ Rü name nixĩ inaxcèx pedèux na Tupana pexna naxâxúcèx i ngêma cuèx rü tauxchagü i rümemaegüxú.

Yigü na ingechaügüxúchiga

Natürü i ñuxma rü tá pexú changúexêê i tacü nixĩ i guxúma i ngêma pemaã nüxú chixuxúârü yexera rümemaêxú.

13

¹ Rü woo togü i nagawa chideaxgu, rü woo Tupanaârü orearü ngeruügü i daxücúâxgawa chideaxgu, natürü ñoma wüxi i tacü i âgaxúrúümare chixĩ ega tama guxâxú changechaügu. ² Rü woo nüxú chacuèxgu na meã duüxügümaã nüxú chixuxú i Tupanaârü ore, rü woo nüxú chacuèxgu i guxúma i tacü i êxügüxú i Tupanachiga,

rü woo choxú natauxchagu na chorü ômaã chayaxĩ-gachixêêxũ ya mèxpúnegü, natürü taxuwama chame ega tama guxãxũ changechaũgu. ³ Rü woo ngẽma duũxũgü i ngearü dïeruãxgüxũxũ chayanuxgu i guxũma i tacü i choxú ngẽxmaxũ,rü woo Tupanaãrü oreçèx chaugü ichaxãxgu na üxüwa choxũ yagugüxücèx,rü taxuwama choxú name i ngẽma ega tama guxãxũ changechaũgu. ⁴ Rü yíxema guxãxũ ngechaũxê,rü yaxna namaã taxĩnü,rü namaã tamecüma. Rü tama tixãũxãchiwèxe,rü tama togüxũ tügü tarüyexera rü tama tügü ticuèxüũ. ⁵ Rü yíxema aixcüma guxãxũ ngechaũxê,rü tama taguxchigawèxe,rü tama tügüguxicatama tarüxĩnü,rü tama tanuxwèxe,rü tama nagu tarüxĩnüêcha ega texé chixexũ tümamaã üxgu. ⁶ Rü tama namaã tataãê i chixexũgü, natürü namaã tataãê i ngẽma ore i aixcüma ixixũ. ⁷ Rü yíxema aixcüma guxãxũ ngechaũxê,rü yaxna namaã taxĩnü,rü guxũguma nüxú tayaxõ,rü guxũguma mexũgu namaã tarüxĩnü,rü taguma naxchi taxai woo tacü tümamaã naxüxgu i togü. ⁸ Rü ngẽma yigü na ingechaũxũ rü tagutáma inayacuèx. Natürü ngẽma na nüxü ixuxũ i Tupanaãrü ore rü wüxi i ngunexũgu tá inayacuèx. Rü ngẽma tama nüxũ icuáxũ i nagawa na idexaxũ,rü tá ta inayacuèx. Rü ngẽma ñuxma nüxũ icuáxũ rü wüxi i ngunexũgu rü marü taxuwatáma tüxú name. ⁹ Erü ngẽma tórü cuèx i ñuxma tüxú ngẽxmaxũ,rü Tupanapéxewa rü naxíra. Rü ngëxgumarüũ ta i ngẽma norü orexũ na ixuxũ,rü wüxi i íramarexütama nixĩ. ¹⁰ Rü guxũma i ngẽma rü tá inayarüxo i ngëxguma Tupanapéxewa ingugügu rü nüma tá guxũxũma tüxũ nacuèxêẽgu. ¹¹ Yexguma chabuxgu

ga chomax, rü wüxi ga buxürüü chidexa, rü buxü nagu rüxñüxügu charüxñü, rü tama meã chauãëxü chacuèx. Natürü yexguma marü chayèxgu, rü nüxü charüxo ga guxüma ga yema chorü bucüma. ¹² Rü ngëma ñuxma nüxü idauxü i Tupanachiga, rü ñoma wüxi i worua ya üxachametüxewa yigü idauxürüü nixĩ na taxcèx naxëxü. Natürü yixcúra rü tá aixcüma meã nüxüxüchi tadau ya Tupana. Rü ñuxma rü írarüwatama nüxü chacuèx i Tupanachiga. Natürü wüxi i ngunexügu rü tá meã nüxü chacuèx i guxüma i nachiga, ngëma na Tupana meãma choxü cuáxürüü. ¹³ Rü ñuxma rü nangëxma i tomaëxpüx i nacümagü i guxügutáma ngexmaxü. Rü ñaãgü nixĩ:

1 Rü Tupanaaxü tayaxögü

2 Rü nüxü ítananguxëe na nataeguxü ya Cristu

3 Rü nüxü tacuèx na tamücüxü ingechaüxü.

Natürü ngëma tomaëxpüxtanüwa rü ngëma rümemaexü nixĩ na guxäxü ingechaüxü.

14

Ngëma tama nüxü icuáxü i nagawa na idexaxüchiga

¹ ¡Rü naxcèx pedèux na guxäxü pengechaüxü! Rü ngëxgumarüü ta name nixĩ i naxcèx pedau i ngema tauxchagü rü ngema cuèx i Naãe i Üünexüwa ne íxü. Rü ngëma cuèx i yexeraãcü penaxwaexü nixĩ na pexü natauxchaxü na nüxü pixuxü i Tupanaarü ore. ² Yíxema duüxë ya tama nüxü tacuáxü i nagawa idexaxe, rü Tupanamaã nixĩ i tidexaxü rü tama i duüxügümaã, erü taxúema nüxü tacuèx na ñuxü ñaxüchiga yíxü. Rü Tupanaãe i Üünexü nixĩ i tüxü idexaxëëxü, natürü ngëma ore i nüxü tixuxü rü ëxüguxü nixĩ. ³ Naturü yíxema nüxü ixuxe i Tupanaarü

ore rü ngema yaxögüxüarü ngüxëëru^{xü} tixĩ, erü yexeraãcü cuèxwa tanangugüxëë rü nüxü tanangúchaxüxëë i ngema ore rü tanataãëxëë i ngema yaxögüxü i ngexguma guxchaxü nüxü üpetügu. ⁴ Rü yíxema duüxë ya tama nüxü tacuáxü i nagawa idexaxe, rü tûmacèxtama nixĩ i ngema na yexeraãcü mea Tupanaãxü tayaxõxücèx. Natürü yíxema nüxü ixuxe i Tupanaarü ore rü nüxü tixu na yexeraãcü Tupanaãxü yaxögüãxücèx i guxüma i yaxögüxü. ⁵ Choma chierü chanaxwèxe na guxãma i pema rü ngëma tama nüxü pecuáxü i nagawa na pidexagüxü. Natürü yexeraãcü chanaxwèxe na duüxügümaã nüxü pixuxü i Tupanaarü ore. Erü ngëma to i nagawa na pidexagüxüarü yexera narümemaë na togümaã nüxü pixuxü i Tupanaarü ore. Natürü ngëma to i nagawa na idexaxü, rü name ega ngëma yaxögüxümaã nüxü ixuxgu na tacüchiga yíixü i ngëma dexa, na nûmagü rü ta yexeraãcü meã Tupanaãxü yaxögüãxücèx. ⁶ Rü ngëmacèx, Pa Chaueneëgüx, rü ngëxguma chi pexütawa chaxüxgu, rü chi to i nagawa chideaxgu, ¿rü tacüwa chi pexü namexü i ngëma? Natürü ngëxguma chi pemaã nüxü chixuxgu i ngëma Tupana tûxü nüxü cuèxëëxü, rü éxna ngëma chomatama nüxü chacuáxü na aixcüma yíixü, rü éxna ngëma ëxügüxü i ñuxma Tupana tûxü nüxü cuèxëëxü, rü éxna tacü rü to i ngüxëëtae i Tupanachiga, rü ngëma waxi nixĩ i pexü mexü. ⁷ ¿Rü dücax ngëma paxetarü i quena rü éxna arpa! Rü ngëxguma tãü chima texé meã napaüxgu, rü tãü chima nüxü tacuèx na tacügu tanapaxüxü. ⁸ Rü ngëma churaragü, rü ngëxguma norü uwanügümaã nügü nadaixchaügu, ¿rü ñuxãcü tá

nügü namexêê na nügü nadèixúcèx ega tama meã nangó-gagu ya yima corneta ya dèixcèx naxcèx çaxũne? ⁹ Rû ngëxgumarũũ ta pexũ nangupetü. Rû ngëxguma chi perü conümaã nüxũ pixuxgu i dexe i taxúema nüxũ cuáxũ, ¿rû ñuxácü tá nüxũ tacuèx na ñuxũ ñaxũchiga yĩxũ i ngëma nüxũ pixuxũ? Rû ñoma ngürüanewa pidexagüxürüũ tá pixĩgü. ¹⁰ Rû aixcüma nixĩ i namuxũ i nagagü i ñoma i naãnewa. Rû guxũma i ngëma nagagü rû name naxcèx i ngëma duũxügü i nawa idexagüxũ. ¹¹ Natürü ngëxguma chi tama nüxũ chacuèxgu i ngëma naga i to i duũxũ chomaã nawa idexaxũ, rû ngëma duũxúcèx rû ñoma to i nachiuãñecũãxrüũ chixĩ, rû chauxcèx rû ñoma to i nachiuãñecũãx i duũxürüũ nixĩ i nümax. ¹² Choma nüxũ chacuèx rû pema rû pexũ nangúchaũ na pexũ nangëxmaxũ i ngëma nacümagü i Tupanaãe i Üünexũ tüxna ãxũ. Natürü name nixĩ i naxcèx pedau na guxũärü yexera pexna naxããxũ i ngëma nacümagü i namaã nüxũ perüngüxêxũ i guxũma i yaxögüxũ na yexeraãcü meã Tupanaãxũ yaxögüãxúcèx. ¹³ Rû ngëmacèx yíxema duũxê ya taxúema nüxũ cuáxũ i nagawa idexaxe, rû name nixĩ i Tupanana naxcèx taca na tüxna naxããxúcèx i cuèx na togümaã nüxũ tixuxúcèx na ñuxũ ñaxũchiga yĩxũ i ngëma nüxũ tixuxũ. ¹⁴ Rû ngëxguma chi taxúema nüxũ cuáxũ i nagawa chayumüxëgu, rû chauãe nixĩ i ngëma yumüxëxũ. Natürü chomatama rû taxuũma chacuèx na ñacüchiga yĩxũ i ngëma. ¹⁵ ¿Rû ñuxácü tá chayumüxëxũ i ñuxmax? Rû marü name nixĩ ega taxúema nüxũ cuáxũ i nagawa chayumüxëgu, natürü chanaxwëxe i guxãma nüxũ cuáxũ i nagawa rû ta chayumüxê. Rû marü name nixĩ ega taxúema nüxũ cuáxũ i nagawa chawiyaegu,

natürü chanaxwèxe i guxãma nüxũ cuáxũ i nagawa rü ta chawiyae. ¹⁶ Erü ngëxguma chi taxúema nüxũ cuáxũ i nagawa Tupanaxũ quicuèxüügu, rü yíxema duüxëgü ya ngema irüxĩnüëxë, rü taxucürüwa cumaã wüxigu Tupanaxũ tikuèxüügü, erü tama nüxũ tacuèx na ñuxũ ñaxũchiga yĩxũ i ngëma nüxũ quixuxũ. ¹⁷ Rü woo ngëma curü yumüxë rü namexëchixgu, natürü yíxema duüxëgü ya ngema irüxĩnüëxë rü taxuüma i mexũ nawa tayaxu ega to i nagawa quideaxgu. ¹⁸ Tupanana moxë chaxã, erü perü yexera taxúema nüxũ cuáxũ i nagawa chidexa. ¹⁹ Natürü woo muxüma i ore i taxúema nüxũ cuáxũ i nagawa na chidexaxũ, natürü ngëma yaxögüxüärü ngutaquéxegüwa rü chauxcèx rü narümemaë chi nixĩ ega woo noxre i ore i meãma nüxũ icuáxüwa namaã nüxũ chixuxgu i Tupanaärü ore na ngëmaäcü ngëmamaã meã chanangúexëëxücèx. ²⁰ Pa Chaueneëgüx, tama name i ñoma buxügürüü chixri nagu perüxĩnüe i ngema ore i pemaã nüxũ chixuxũ. Rü narümemaë nixĩ i ñoma buxügürüxü pegü pixĩgüxëë naxchëxwa i ngema chixexũ, natürü ngema peru ñnüwa rü penaxwèxe i duüxügü i marü yaxürüü mea nagu perüxĩnüe rü nagu pexĩ i ngema ore i pemaã nüxũ chixuxũ. ²¹ Tupanaärü ore ga nuxcümaüxü ga norü orearü uruü ümatüxü rü ñanagürü:

“Rü nuã tá chanamugü i to i nachiuñanecüãx i duüxügü na to i nagawa yadexagüxücèx namaã i ñaã Yudíugü i tama yaxögüxü. Natürü woo ngëmaäcü chanaxüxgu, rü täütãma chauga naxĩnüë i ngëma Yudíugü i tama irüxĩnüëchaüxü”,

ñanagürü ga Tupana. ²² Rü ngëmacèx ngëma na taxúema nüxũ cuáxũ i nagawa idexaxü, rü wüxi i cuèxruü nixĩ naxcèx i ngëma duüxügü i tama

irüxĩnüēchaũxũ. Rũ tama duũxũgũ i marũ yaxõgũxũcèx nixĩ i ngẽma. Natürũ ngẽma Tupanaãrũ orexũ na ixuxũ, rũ duũxũgũ i marũ yaxõgũxũcèx nixĩ na yexeraãcü meã Tupanaãxũ yaxõgũãxũcèx. Rũ tama duũxũgũ i tama irüxĩnüēchaũxũcèx nixĩ i ngẽma. ²³ Rũ ngẽxguma chi pema i yaxõgũxe pengutaquẽxegũgu, rũ guxã chima to i nagawa pidexagũgu, ¿rũ ñuxũ ñaxũ tá ega petanũgu naxücuxgu i wüxi i duũxũ i ngẽma iyarüxĩnũxũ rũ éxna wüxi i duũxũ i tauta yaxõxũ? ¿Taux éxna i nagu tá naxĩnũxũ na pexãũãẽgũxũ i pemax? ²⁴ Natürũ ngẽxguma chi guxãma i pema nüxũ pixuxgu i Tupanaãrũ ore, rũ chi petanũgu naxücuxgu i wüxi i duũxũ i tama yaxõxũ rũ éxna wüxi i duũxũ i ngẽma iyarüxĩnũxũ, rũ tá nüxũ naxĩnü i ngẽma Tupanaãrũ ore i nüxũ pixuxũ. Rũ ngẽmaãcü tá nüxũ nacuèx na nũma rũ wüxi i pecaduáxũ na yĩxũ. Rũ nügũgu tátama ínaruĩnũ i ngẽxguma nüxũ naxĩnügu i ngẽma nüxũ pixugüexũ. ²⁵ Rũ ngẽma chixexũ i nüxĩcatama nüxũ nacuáxũ rũ tá naxcèx ínacuèx. Rũ nũma rũ ngẽxma tá nacaxãpũxũ, rũ tá Tupanaxũ nicuèxũũ. Rũ tá nüxũ nixu na aixcüma Tupana petanũwa nangẽxmaxũ.

Tama name i penaxĩxãchiãxẽgũ i perũ ngutaquewa, rũ name i meamare penaxũ

²⁶ Dücèx, Pa Chaueneẽgũx, ñuxma tá pemaã nüxũ chixu na ñuxãcü tá penaxũxũ ega ngẽxguma pengutaquẽxegũgu. Rũ ñuxre i pema rũ marũ name na Tupanaãrũ wiyaegu pewiyaegũxũ, rũ togue rũ tanguxẽẽtaegũxũ, rũ togue rũ nüxũ tixuxũ i ngẽma ore i Tupana tũxũ nüxũ cuèxẽẽxũ, rũ togue rũ nawa tidexagũxũ i naga i tama nüxũ tacuèxgũxũ, rũ togue rũ tanangoxẽẽgũxũ i ngẽma dexa i to i

nagawa nüxũ yaxugũxũ. Natürü guxũma i ngẽma rü tanaxwẽxe i yaxõgũxũãrũ ngũxẽẽcèx na yĩxũ, na yexeraãcü yaxõgũãxũcèx rü meã Tupanacèx namaxẽxũcèx. ²⁷ Rü ngẽxguma to i naga i pema tama nüxũ pecuáxũwa pidexagũgu, rü name nixĩ i taxre rü éxna tomaẽxpũxicatama tidexagũ. Rü tanaxwẽxe i wüxiexira tidexa i noxri rü yixcama ya togue. Rü ngẽxguma chi texé to i nagawa ideaxgu, rü name nixĩ na tangẽxmaxũ ya wüxie ya nüxũ ixuchigũxe na țacũchiga yĩxũ i ngẽma ore i to i nagawa nüxũ yaxuxũ. ²⁸ Natürü ngẽxguma chi tatauxgu na texé nüxũ ixuchigũxũ na țacũchiga yĩxũ i ngẽma ore i to i nagawa nüxũ yaxuxũ, rü narũmemaẽ nixĩ na noxtacũma tama to i nagawa pidexagũ i perũ ngutaquéxewa. Rü narũmemaẽ i wüxichigũ tũxica Tupanamaãxĩcatama bexma tidexa. ²⁹ Rü ngẽxgumarũũ ta ngẽxguma pengutaquéxegũgu, rü name nixĩ i taxre rü éxna tomaẽxpũxicatama nüxũ tixu i Tupanaãrũ ore. Rü ngẽma togũ i ngutaquéxetanũxũ rü name nixĩ na meã nangugũgũãxũ i ngẽma ore. ³⁰ Natürü ngẽxguma chi íyadexayane i wüxi i duũxũ, rü Tupana tũmamaã ideaxgu ya togue ya ngẽma rütuxe, rü name nixĩ na iyanachianexũ i ngẽma nüxĩra idexaxũ na tidexaxũcèx ya yixema duũxẽ ya Tupana tũmamaã idexaxe. ³¹ Rü ngẽmaãcü guxãma i pema na Tupana pemaã idexaxũ, rü name nixĩ i wüxichigũ ípenanguxẽẽ na pewa nanguxũ na pidexagũxũ i Tupanaãrũ ore. Rü ngẽmaãcü i ngẽma togũ i ngutaquéxetanũxũgũ rü tá Tupanachiga meã nangúe rü tá nataãẽgũ. ³² Rü ngẽmaãcü tanaxwẽxe i meãma tũmaãẽmaã itacuèx ya wüxichigũ ya yixema Tupanaãrũ orexũ ixuxe. ³³⁻³⁴ Erũ

perü ngutaquéxegüwa rü Tupana nanaxwèxe na meã penaxüxü i guxüma, rü tama nanaxwèxe na ngema pexãügatanüxü rü pegü ípetüexëxü. Rü guxüma i togü i yaxögüxüärü ngutaquéxegüwa rü marü nüxü nayapue na tama yadexagüxü i ngexügü. Rü name nixĩ i pema rü ta ngëmaãcü penaxü, erü nachüxu na yadexagüxü i ngexügü i ngutaquéxegüwa. Rü name nixĩ na yatügüga naxĩnüëxü i ngexügü, ngëma Tupanaärü ore tüxü muxürüü. ³⁵ Rü ngëxguma chi tacüxü nacuáxchaügu i wüxi i ngexü, rü name nixĩ i nachiüwatama natena naca i nachiga i ngëma. Erü wüxi i ãne nixĩ ega ngutaquéxewa yadeaxgu i wüxi i ngexü. ³⁶ Pa Corítiucüãxgüx, name nixĩ na nüxna pecuëxãchiexü na tama pewaxira ne naxüxü i Tupanaärü ore. Rü tama pexicatama nixĩ i penayauxgüxü i ngëma. ³⁷ Rü ngëxguma chi texé tügügu rüxĩnügu na Tupanaärü orearü urüü tixü rü éxna tügügu tarüxĩnügu na Tupanaãe i Ünexü tüxna naxãxü i tacü rü cuèx, rü name nixĩ i nüxna tacuëxãchi na tórü Coriarü ore yixü i ñãã ore i pexcèx chaxümatüxü. ³⁸ Natürü ngëxguma chi texé tama nüxü cuáxchaügu i ngëma pemaã nüxü chixuxü, rü name nixĩ i tama tüxü pecuáxchaü. ³⁹ ¡Rü ngëmacèx, Pa Chaueneëgüx, rü Tupanana naxcèx peca i cuèx na meãma nüxü pixuxücèx i norü ore! ¡Rü tama penachüxu na to i nagawa yadexagüxü i duüxügu! ⁴⁰ Rü perü ngutaquéxegüwa, rü name nixĩ na meã penaxüxü i guxüma. Rü tama name i ngema pexãügatanü rü pegü ípetüexë.

¹ Rū ñuxmax, Pa Chaueneëgüx, rü chanaxwèxe i nüxna pecuèxächie i ngëma Tupanaärü ore i tüxũ maxëxëxũ ga pemaã nüxũ chixuxũ. Rū yematama ore nixĩ ga pema peyaxgüxũ. Rū ñuxma rü ngëmatama oregagu nixĩ i meã peyaxögüxũ. ² Rū ngëma oregagu nixĩ i pexũ nangëxmaxũ i maxũ i taguma gúxũ, ega aixcúma guxũguma peyaxögüamagu. Natürü ngëxguma tama guxũguma peyaxögügu, rü natücèxmamare nixĩ i ngëma perü õ. ³ Rū yexguma noxri petaniüwa changuxgu, rü yema nüxira pexũ changuxëxũ nixĩ ga yema chaxira togü choxũ nguxëxũ na Cristu rü tórü pecaducèx nayuxũ, ngëma Tupanaärü ore i ümatüxũwa nüxũ yaxuxürüü. ⁴ Rū yexgumarüü ta pexũ changúexëë na ñuxäcü inatëxgüãxũ, rü ñuxäcü norü tomaëxpüx ga ngunexũgu rü wena na namaxũxũ, ngëma Tupanaärü ore i ümatüxũwa nüxũ yaxuxürüü. ⁵ Rū yexgumarüü ta pexũ changúexëë ga ñuxäcü Pedrucèx na nangóxũ ga Cristu, rü ñuxäcü yixcúra rü norü ngúexũgü ga yamugüxücèx na nangóxũ. ⁶ Rū yemawena ga Cristu rü noxtacúma 500 arü yexera ga yaxögüxücèx nangox. Rū muxũma i ngëma duüxũgü rü ñuxma rü ta namaxë, natürü nümaxũ rü marü nayue. ⁷ Rū yemawena rü Chaütiágucèx nangox, rü yixcama guxũma ga yema togü ga ngúexũgücèx nangox. ⁸ Rū düxwa chowa inayacuèx ga chauxcèx rü ta na nangóxũ, woo ngürüächimare nixĩ ga yema, ngëxgumarüü i wüxi i buxũ i tautama norü ngunexũwa nanguyane buxürüü. ⁹ Rū choma rü guxũma i ngëma togü i Tupana imugüxütüüwa chaxü. Rū ngemacèx tama name i Tupana imuxũmaã choxũ naxugüxũ i duüxũgü, yerü nawe chingëchigü ga Tupanaärü duüxũgü rü poraäcü chixexũ chaxü. ¹⁰ Natürü

ga Tupana rü chomaã namecüma, rü ngëmacèx i ñuxma rü choxũ pedau na ȧacü chiĩxũ rü ñuxäcü na chiĩxũ. Rü yema chomaã na namecümaxũ rü tama natücèxma nixĩ. Yerü choma rü guxũ ga togü ga yamugüxũãrũ yexera chanaxü ga Tupanaãrũ puracü. Natürü tama chauechama chanaxü ga yema puracü, natürü Tupana ga chomaã mecümacü rü chomaã puracücü nixĩ ga naxücü ga yema puracü na nüxũ chixuxücèx ga norü ore. ¹¹ Natürü i ñuxma rü nüetama nixĩ ega woo choma chixĩgu rü éxna togü yixĩgu ga pemaã nüxũ ixuxũ ga yema ore. Yerü yema ore ga pemaã nüxũ tixuxũ, rü Tupanaãrũ ore i tüxũ maxëxëxũ nixĩ, rü yema nixĩ ga pixögüxũ.

Ñuxäcü wena tá namaxë i duũxügü i yuexũ

¹² Marü pemaã nüxũ tixu na Cristu rü yuwa ínadxũ. ¿Rü tüxcüü ñuxre i pema rü ñaperügügü:

“Yuexũ rü tagutáma wena namaxë”, ñaperügügü? ¹³ Rü ngëxguma chi ngëma yuexũ rü tagu chima wena namaxëgu rü yima Cristu rü tãũ chima wena namaxũ. ¹⁴ Rü yexguma chi Cristu tama wena maũxgu, rü ngëma ore i nüxũ tixuxũ i nachiga rü taxuwa chima name, rü natücèxmamare chi nixĩ i perü õ. ¹⁵ Rü ngëxguma chi ngëmaãcü yixĩgu, rü toma i Tupanaãrũ orearü uruügü rü doratèxgüxũ tixĩgü. Erü nüxũ tixu na Tupana Cristuxũ wena maxëxëxũ. Rü ngëxguma chi tama aixcüma yixĩgu na wena namaxëxũ i yuexũ, rü chi wüxi i doramare nixĩ na Tupana Cristuxũ wena maxëxëxũ. ¹⁶ Rü ngëxguma chi ngëma yuexũ rü tagu chima wena namaxëgu, rü ga Cristu rü chi ta tãũ chima wena namaxũ. ¹⁷ Rü yexguma chi Cristu tama wena maũxgu, rü natücèxmamare chi nixĩ i peyaxögüxũ, rü ñuxma rü chi ta perü pepadugagu

ipeyarütauxe. ¹⁸ Rü chi ngẽmaãcü yixĩgu rü ngẽma duũxũgü i Cristuaxũ yaxõgũxũ i marü yuexũ, rü chi ta tãũ chima nüxũ nangẽxma i maxũ i taguma gúxũ. ¹⁹ Rü ngẽxguma chi ñoma i maxũcèxicatama yixĩgu na Cristuaxũ yaxõgũxũ, rü chi guxũ i togü i duũxũgüarü yexera tangechaütümüügü. ²⁰ Natürü aixcũmaxũchi nixĩ ga Cristu ga yuwa na ínadxũ. Natanüwa i guxũma i ngẽma yuexũ i yixcũra tá írüdagũxũ, rü Cristu nixĩ ga namaã inaxügücü na ínadxũ, yerü nüma nixĩ ga nüxĩra wena namaxũxũ. ²¹ Rü yexgumarüü wüxi ga yatügagu na nayuexũ ga duũxũgü, rü ngẽxgumarüü tá ta nixĩ na wüxi i yatügagu wena namaxẽxũ i ngẽma marü yuexũ. ²² Rü ngema na Adáũgagu guxãma na yuexũ, rü ngẽxgumarüü ta Cristugagu tá namaxẽxũ i guxũma i duũxũgü i nüxũ yaxõgũxũ. ²³ Natürü wüxichigü tá tũmawa nangu na wena tamaxũxũ. Rü Cristu nixĩ ga nüxĩra maxũcü. Rü ngẽxguma wena núma naxũxgu i nümax, rü ngẽxguma tá nixĩ i wena namaxẽxũ i ngẽma duũxũgü i noxrü ixĩgũxũ. ²⁴ Rü ngẽmawena tá nixĩ i nagúxũ i naãne. Rü ngẽxguma tá nixĩ ya Cristu i nüxũ naporamaẽxũ i guxũma i norü uwanügü. Rü ngẽxguma tá nixĩ i Nanatü ya Tupanana naxããxũ i guxũma na nüma namaã inacuáxũcèx. ²⁵ Erü nüma ya Cristu rü ãẽxgacü tá nixĩ ñuxmatáta nüxũ naporamaẽ i guxũma i norü uwanügü. ²⁶ Rü ngẽma nawa iyacuáxũ i norü uwanü i tá nüxũ naporamaẽxũ, rü yu nixĩ. ²⁷ Yerü Tupana rü marü Cristuméxẽwa nanayexmagüxẽẽ ga guxũma. Natürü woo Tupanaãrü ore nüxũ ixuxgu na Cristuméxẽwa nangẽxmagüxũ i guxũma, natürü nümatama ya Tupana

rü tama Cristuméxēwa nangēxma. Yerü nüma ga Tupana nixī ga Cristuméxēwa nayexmagüxēēāxū ga guxūma. ²⁸ Rü ngēxguma guxūma Cristuméxēwa ngēxmagügu, rü ñuxūchi nūmatama ya Cristu ya Tupana Nane rü tá Nanatüméxēwa nügü nangēxmaxēē. Yerü nüma ga Tupana nixī ga Cristuméxēwa nayexmagüxēēāxū ga guxūma. Rü ngēmaācü ya Tupana rü guxūmaā tá inacuèx. ²⁹ Rü nangēxma i ñuxre i duūxūgü i petanūwa i Tupanaegagu yuexūchicüü íbaiūxū. ¿Rü tūxcüü ngēma naxügü? Rü ngēxguma chi tama wena namaxēgu i duūxūgü i yuexū, ¿rü tūxcüü ngēma yuexūchicüü ínabaiū? ³⁰ ¿Rü tūxcüü i toma rü guxūguma āücūmaxūwa tangēxmagü? ³¹ Pemaā nüxū chixu, Pa Chaueneēgüx, rü guxū i ngunexūgu rü āücūmaxūwa changēxma, rü tama nüxū chachuèx i tacü rü ngunexūgu Tupanaārü oregagu tá na chayuxū. Rü ngēma rü aixcūmaxūchi nixī, ngēxgumarüü na aixcūma yīxū na choxū nangēxmaxū i wüxi i taāē i taxū i ñuxma na tórü Cori ya Ngechuchu ya Cristuaxū peyaxōgüxū. ³² Choma rü nuā Epéchiuwa rü Tupanaārü orchigagu chorü uwanūmaā poraācü togü tachoxūgagü. Rü ñoma naēxū i idüraexūmaā togü tadèixūrūü tixīgü. ¿Natürü tacüwa choxū namexū ga yema ega chorü maxū i ñoma i naānewa choxū ngēxmaxūcèxicatama yixīgu? Rü ngēxguma chi aixcūma yixīgu na tama wena namaxēxū i yuexū, rü marü name i ñatarügügü:

“¡Ngīxā tachibüe rü taxaxegü, erü paxa tá tayue!” ñatarügügü. ³³ ¡Natürü tāūtáma nawe perüxī i ngēma duūxūgü i ngēmaācü chixri idexagüxū! Erü aixcūma nixī i ngēma ore i ñaxū:

“Rü texé ya chixexũ i duũxũmaã ãmücũxe, rü tüxũ in-ayanaxoxêê i tũmacũmagũ i mexũ”, ñaxũ. ³⁴ Rü name nixĩ i meã pegũãêgu perũxĩnũê rü nüxũ perũxoe i ngẽma perũ chixexũgũ. Rü wũxi i perũ ãne nixĩ na pemaã nüxũ chixuxũ rü ñuxre i pema rü tama aixcũma Cristuarũ duũxũgũ pixĩgũxũ rü tama aixcũma Tupanaxũ pecuèxgũxũ.

Ñuxãcü wena namaxê i yuexũgũ

³⁵ Natürũ ngürũãchi tá texe pexna taca rü ñatarũgũ pexũ:

“¿Ñuxãcü tá wena namaxêxũ i yuexũ? ¿Rü nañuxraũxũ i naxũnemaã tá ínadagũxũ?” ñatarũgũ tá pexũ. ³⁶ Pa Duũxũ i Ngẽãemarexũx ¡rũ dücax! Rü ngẽxguma wũxi ya nanetũchire itoxgu, rü nüma ya yima naxchire rü nayu na ngemaãcü naxũxũcèx i ngẽma nanetũ. ³⁷ Rü ngẽma waixũmũgu itoxũ, rü tama marũ nanetũ ixĩxũ nixĩ, natürũ naxchire nixĩ ya yima itoxũne woo triguchire rü éxna ngexũrũxũmare i to i nanetũchire yixĩgu. ³⁸ Rü ngẽxguma marũ inatoxguwena, rü Tupana nixĩ i yanaxũxêêcü ya yima nachire na nüma nanaxwèxexũãcüma yĩxũcèx i ngẽma nanetũ. ³⁹ Rü tama guxũ i naxũnegũ nawũxigu. Rü duũxêxũne rü nanatoraxũ, rü naêxũgũxũne rü to nixĩ, rü werigũxũne rü to nixĩ, rü choxnigũxũne rü to nixĩ. ⁴⁰ Rü ngẽxgumarũũ ta nangẽxma i naxũnegũ i daxũgũxũ i naãnecũãx, rü nangẽxma i naxũnegũ i ñoma i naãnecũãx. Rü ngẽma daxũgũxũ i naãnecũãx i naxũnegũ rü nüxũ nangẽxma i noxrũtama mexũ, rü ngẽma ñoma i naãnecũãx i naxũnegũ rü ta nüxũ nangẽxma i noxrũtama mexũ. Natürũ tama nawũxigu i ngẽma norũ mewa. ⁴¹ Rü üèxcüarũ yauracũũ rü tama namaã nawũxigu i tauemacüarũ

yauracüü. Rü woramacurigiärü yauracüü rü to nixĩ. Rü nügütanüwa ya woramacurigü, rü tama nawüxigu i norü yauracüüwa. ⁴² Rü ngëxgumarüü tá ta naxüpetü namaã i naxünegü i ngëma duïxügü i yuexü. Erü ngëma naxüne i noxri nüxü ngëxmaxü rü iyarüxoxwëxexü nixĩ. Natürü ngëma naxüne i tá nüxü ngëxmaxü i ngëxguma wena namaxëgu, rü ngëma rü tagutáma inayarüxo. ⁴³ Rü ngëma naxüne i yuxü rü taxuwama name i ngëxguma inatëxgux. Natürü ngëxguma wena namaüxgu rü tá namexëchi. Rü ngëma naxüne i ñuxma turaxü rü ngëxguma wena namaüxgu rü tá napora. ⁴⁴ Rü itanatëx i ngëma naxüne i ñoma i naãnecüãx ixixü. Natürü ngëxguma ínadxgu, rü daxücüãx i naxüne tá nixĩ. Rü ñuxma na nangëxmaxü i naxüne i ñoma i naãnecüãx rü ngëmawa nüxü tacuèx na nangëxmaxü ta i naxüne i daxücüãx. ⁴⁵ Tupanaärü ore i ümatüxüwa rü ñanagürü:

“Guma nüxiraücü ga yatü ga Adáü rü nüxü nayexma
ga ñoma ga naãnecüãx ga naxüne ga paxaãchi
maxüxü”,

ñanagürü. Natürü ya Cristu rü daxücüãx nixĩ. Rü nüma nixĩ i tüxna naxããxü i maxü i taguma gúxü. ⁴⁶ Noxri rü tüxü nangëxma i ñoma i naãnecüãx i taxüne. Natürü yixcama rü Tupana tá tüxna nanaxã i to i taxüne i daxücüãx ixixü. ⁴⁷ Guma nüxiraücü ga yatü ga waixümüwa ücü, rü ñoma ga naãnecüãx nixĩ. Natürü tórü Cori ya Cristu rü daxüguxü i naãnecüãx nixĩ. ⁴⁸ Rü ngëma taxünegü i ñoma i naãnewa tüxü ngëxmaxü, rü guma Adáüxüne ga waixümüwa ücürüü nixígü. Natürü ngëma naxünegü i daxüwa nüxü ngëxmaxü i duïxügü, rü Cristuxünerüü nixígü. ⁴⁹ Rü ñgëxgumarüü na Adáü ga waixümüwa

üürüü na yĩxũ i taxüne, rü ngëxgumarüü tá ta Cristu ya daxüwa ngëxmacürüü nixĩ i taxüne i yixcüra. ⁵⁰ Rü dücax, Pa Chaueneëgüx, pemaã nüxũ chixu rü ñaã taxüne i namachinaxcèx rü naxchinèxãnaxcèx, rü taxucürüwa Tupana ãëxgacü íyĩxũwa nangu. Erü ngëma iyarüx-oxũ, rü taxucürüwama Tupanaxütawa i ngextá taxuüma íyarüxoxũwa nixücu. ⁵¹ Natürü chanaxwëxe na nüxũ pecuáxũ i wüxi i ore i ëxũguxũ ga noxri Tupanaxĩcatama nüxũ cuáxũ. Rü dücax, tãütáma guxã tayue, natürü guxãxüne rü tá naxüchicüü. ⁵² Rü ngürüächimare wüxi i peãxëtügu tá nixĩ i ngëma na naxüchicüüxũ i taxüne i ngëxguma naãneärü guxgux naxãgagu ya corneta. Rü tá naxãga ya yima corneta, rü ngëxguma i ngëma duüxügü i yuexũ rü tá ínarüdagü na tagutáma wena nayuexücèx. Rü yixema na imaxëxũ rü tá naxüchicüü i taxünegü. ⁵³ Erü ngëma taxüne i yuxwëxexũ rü woetama tama taixũ rü tá naxüchicüü. Rü wüxi i ngexwacaxũxũ i naxüne i aixcüma taixũ rü tagutáma yuxũ tá nixĩ. ⁵⁴ Rü ngëxguma ngëmaãcü naxüchicüügu i taxüne i yuxwëxexũ, rü tüxũ nangëxmagu i taxüne i ngexwacaxũxũ i taguma yuxũ, rü ngëxguma tá nixĩ i yanguxũ i Tupanaärü ore i ümatüxũ i ñaxũ:

“Marü inayarüxo na nayuexũ i duüxügü. Rü Tupana rü marü yuxũ narüyexera. ⁵⁵ Rü dücax, Pa Yux, ¿ngëxũ i curü pora i namaã toxũ curüyexeraxũ? ¿Rü ngëxũ i ngëma cuxne i namaã toxũ cudëixũ?” ñanagürü i ngëma Tupanaärü ore. ⁵⁶ Rü ngëma naxne i yu, rü pecadu nixĩ. Erü ngëma pecadu nixĩ i naporaxëëxũ i ngëma yu na tüxũ nadëixücèx. Rü ngëma mugü ga Moïché ümatüxũ nixĩ i naporaxëëxũ i pecadu, erü woo namexgu i ngëma mugü, natürü taxucürüwama texé

aixcūma tayanguxẽẽ. ⁵⁷ Natürü name nixĩ i Tupanana moxẽ taxã yerü núma nanamu ga tórü Cori ya Ngechuchu ya Cristu na ngẽma yuxũ tüxũ naporamaẽxẽẽxũcèx. ⁵⁸ Rũ ngẽmacèx, Pa Chaueneẽgü ya Pexũ Changechaũgüxex, rü name nixĩ i meã peyaxõgüama rü taguma ípenatèx i Tupanaãrũ ore. Rũ name nixĩ i guxũguma meã penaxü i tórü Coriarũ puracü, erü pema nüxũ pecuèx rü ngẽma puracü i nüxũ pexũxũ, rü tama natücèxma nixĩ.

16

Togü i yaxõgüxũcèx inanutaque ga dïeru

¹ Rũ ñuxma tá pemaã nüxũ chixu i nachiga i ngẽma dïeru i penutaquẽxexũ na namaã nüxũ perüngüxẽẽgüxũcèx i taeneẽgü i yaxõgüxũ i Yudéaanewa ngẽxmagüxũ. Rũ ngẽma yaxõgüxũ i Gárataanewa ngẽxmagüxũ rü marü namaã nüxũ chixu na ngĩxũ nanutaquẽxegüxũ i ngẽma dïeru. Rũ chanaxwèxe i pema rü ta ngẽxgumarüũ penaxü. ² Rũ ngema dïeru i perü puracüwa ngxĩ peyaxucüwa rü guxcü i yüxüarü ngunexügu rü tá ngxĩ pexã i ngẽma dïeru i Tupanaarũ ixĩcü. Rũ ngĩmaã tá penguxũ na tama ngẽxguma ngema changuxguama ngĩxũ na pedexũcèx. ³ Rũ ngẽxguma petanüwa changuxgu, rü tá chanaxümatü i ñuxre i poperagü naxcèx i taeneẽgü i Yerucharéüwa ngẽxmagüxũ. Rũ ñuxüchi ngẽma poperamaã tá Yerucharéüwa chanamugü i ngẽma duũxũgü i pema nüxũ pexunetaxũ na ngema ngĩxũ nangegüxũcèx i ngẽma dïeru i taeneẽgücèx ngĩxũ penutaquẽxecü. ⁴ Rũ ngẽxguma chi choxũ natauxchagu na ngema Yerucharéüwa chaxũxũ, rü nümagü rü tá wüxigu chomaã ngema naxĩ.

Pauru nagu narüxĩnü na Corĩtiuwa naxũxũ

⁵ Choma rü Machedóniããnewa tá chaxüpetü na íchayadauxücèx i taeneëgü i ngema ngëxmagüxũ. Rü ngëmawena rü tá petanüwa changu na pexũ íchayadauxücèx. ⁶ Rü ngürüãchi tá ñuxre i ngunexügü ngëxma petanügu charüxãũx, rü bexmana ngürüãchi ngema petanüwa tá chanangupetüxëë ya mucü. Rü ngëxguma rü tá pexũ natauxcha na choxũ perüngüxëëgüxũ na ngëma íchaxüxchaũxüwa chaxüxücèx. ⁷ Erü tama chanaxwèxe i paxaãchimare pexũ chadau. Natürü petanügu charüxãũxchaũ i ñuxre i ngunexü ega chi norü ngúchaxũ yixĩxgu ya tórü Cori. ⁸ Natürü nuã Epéchiuarü iãnewa tá changëxma ñuxmatáta Pëtecóstearü ngunexüwa nangu. ⁹ Erü nuã rü tórü Cori poraãcü choxũ nanatauxchaxëë na nüxũ chapuracüxücèx rü nüxũ yaxögüãxücèx i muxüma i duüxügü woo namu i ngëma tama naxwèxegüxũ na nuã chapuracüxũ. ¹⁰ Rü ngëxguma chi Timutéu petanüwa nguxgu, rü chanaxwèxe i meãma penayaxu na petanüwa nataãëxücèx. Erü nüma rü ta chauxrüũ tórü Coriarü puracüwa napuracü. ¹¹ Rü ngëmacèx tama chanaxwèxe i texé petanüwa nüxũ taxoe. Natürü chanaxwèxe i nüxũ perüngüxëë na taãëãcüma nuã naxüxũ na choxũ íyadauxücèx. Erü poraãcü íchananguxëë na nuã nanguxücèx namaã i ngëma togü i taeneëgü. ¹² Rü ngëma taeneë i Aporu rü poraãcü nüxũ chacèxũ na petanüwa íyadauxücèx namaã i ngëma togü i taeneëgü. Natürü tama ngema naxüxchaũ i ñuxmax. Natürü ngëxguma naxãchicagu rü tá ngema naxũ.

Pauru nüxũ narümoxë ga yema yaxögüxũ

¹³ ꞑRü pexuãëgü na taxuũma i chixexũgu peyixũcèx!
 ꞑRü meãma peyaxõgüama woo tacü pexũ üpetügu!
 Rü name nixĩ i peporaeama rü taxucèxma pemuũë.
¹⁴ Rü guxũma i ngẽma pexũxũ, rü name nixĩ i
 pegü pengechaũgüãcũma penaxü. ¹⁵ Rü dücax, Pa
 Chaueneëgüx, pema nüxũ pecuèx na Estéfanatanüxũgü
 yĩixũ ga nüxĩra yaxõgüxũ ga Acayaanewa. Rü
 meãma nüxũ pecuèxgü na ñuxãcü poraãcü taeneëgü
 i yaxõgüxũxũ na nangũxëëgüxũ. ¹⁶ Rü chanaxwèxe i
 naga pexĩnüë i ngẽma duũxũgü i Estéfanatanüxũgürüũ
 ixĩgüxũ. Rü ngëxgumarüũ ta chanaxwèxe i naga pexĩnüë
 i guxũma i ngẽma duũxũgü i ñaã Tanatüarü puracüwa
 puracüexũ rü ngũxëëtaegüxũ. ¹⁷⁻¹⁸ Rü ñuxma na
 taxucürüwama chauxütawa pengëxmagüxũ, rü wüxi ga
 chorü taã nixĩ na núma naxĩxũ ga taeneëgü ga Estéfana
 rü Fortunátu rü Acáicu. Rü yema taeneëgü ga núma ìxũ
 rü pexũ nixuchigagü rü yemaãcü choxũ nataãëxëëgü
 ga yema pexũ na nataãëxëëgüxũrũ. Rü tanaxwèxe
 i naga pexĩnüë rü nüxũ pengechaũ i ngẽma duũxũgü i
 ngëmagürüũ ixĩgüxũ. ¹⁹ Rü guxũma i taeneëgü i yaxõgüxũ
 i Áchiaaneãrũ ñãnegüwa ngëxmagüxũ, rü moxë peccèx
 ngema namugü. Rü Aquiru rü Prisila rü guxũma i ngẽma
 yaxõgüxũ i Aquirupatawa ngutaquëxegüxũ, rü moxë
 peccèx ngema namugü naegagu ya tórü Cori. ²⁰ Rü
 guxũma i taeneëgü i núma ngëxmagüxũ rü moxë peccèx
 ngema namu. Rü chanaxwèxe i wüxichigü i pema rü
 pegü pengechaũgüãcũma pegü perümoxëgü. ²¹ Choma
 i Pauru rü choxmëxmaãtama peccèx chanaxümatü i
 ñaã chorü moxë. ²² Rü ngëxguma chi texé tama tórü
 Cori ya Ngechuchu ya Cristuxũ ngechaũgu, rü Tupana

tá tũxũ napoxcu. Rũ paxa tá ínangu ya tórũ Cori. ²³ Rũ chanaxwèxe i tórũ Cori ya Ngechuchu ya Cristu poraãcũ pexũ narũngũxẽẽ.. ²⁴ Rũ guxãma i pema, rũ poraãcũ pexũ changechaũãcũma pexũ charũmoxẽ naegagu ya tórũ Cori ya Ngechuchu ya Cristu.

Rũ nuãma pexna,
Pauru

Tupanaarü Ore i Tóriu Cori ya Ngechuchu ya Cristuchiga
New Testament in Ticuna (PE:tca:Ticuna)

copyright © 2008 Wycliffe Bible Translators, Inc.

Language: Ticuna

Translation by: Wycliffe Bible Translators, Inc.

Ticuna

tca

Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

- You must give Attribution to the work.

- You do not sell this work for a profit.

- You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ticuna

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

- You include the above copyright and source information.

- You do not sell this work for a profit.

- You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective

copyright owners.

2014-04-30

PDF generated using Haiola and XeLaTeX on 14 Jun 2022 from source files dated 28 May 2022

9d5dc22a-30be-5d26-85a9-76047f4c89e6